

摘藻堂四庫全書薈要

史部

欽定四庫全書薈要

史部

御定資治通鑑綱目三編卷三十三
五

詳校官編修臣汪鏞



欽定四庫全書薈要卷七千四百四十五史部

御定資治通鑑綱目三編卷三十三

起甲子明熹宗天啓四年
盡丁卯明熹宗天啓七年 凡四年

四年春正月何宗彥卒

宗彥清修有執攝尚書事六年遇事侃侃敷奏時望甚隆會推閣臣廷臣多首宗彥獨吏科給事中張廷登不署名遂不獲預宗彥旋乞假去神宗末齊黨勢甚非同類即排去之宗彥獨無所附麗故終不安其位光宗立即家拜禮部尚書兼東閣大學士天啓元年夏還朝屢加吏部尚書建極殿大學士及是卒於官

日赤無光有黑子

是日癸未日赤無光有黑子
二三蕩于旁漸多至百許

二月京師地震

宮殿動搖有聲銅缸之水騰波震盪
帝遂不豫至三月始愈地復屢震

夏六月左副都御史楊連劾魏忠賢二十四大罪中旨

切責連

忠賢肆惡日甚連抗疏列其大罪二十有四其畧曰
高皇帝定令內官不許干預外事違者法無赦乃有
肆無忌憚濁亂朝常如東廠太監魏忠賢者敢列其
罪狀言之忠賢本市井無賴中年淨身竄入內地初

猶謬為小忠小信以倖恩繼乃敢為大奸大惡以亂
政祖制以擬旨專責閭臣自忠賢擅權多出傳奉或
徑自內批壞祖宗二百餘年之政體大罪一劉一燝
周嘉模顧命大臣也忠賢令孫杰論去急于翦已之
忌不容陛下不改父之臣大罪二先帝賓天實有隱
恨孫慎行鄒元標以公義發憤忠賢悉排去之顧于
黨護選侍之沈瀧曲意綢繆終加蟒玉親亂賊而儼
忠義大罪三王紀鍾羽正先年功在國本及紀為司
寇執法如山羽正為司空清修如鶴忠賢構黨斥逐
必不容盛時有正色立朝之直臣大罪四國家最重
無如枚卜忠賢一手握定力阻首推之孫慎行盛以
宏更為他辭以錮其出豈真欲門生宰相乎大罪五
爵人于朝莫重廷推去歲南太宰北少宰皆用陪推
致一時名賢不安其位顛倒銓政掉弄機權大罪六
聖政初新正資忠直乃滿朝薦文震孟熊德陽江東
謙徐大相毛士龍侯震暘等抗論稍忤立行貶黜屢

經恩典克阻賜環長安謂天子之怒易解忠賢之怒難調大罪七然猶曰外廷臣子也去歲南郊之日傳聞宮中有一貴人以德性貞靜荷上寵注忠賢恐其露已驕橫托言急病置之死地是陛下不能保其貴倖矣大罪八猶曰無名封也裕妃以有娠傳封中外方為慶幸忠賢惡其不附已矯旨勒令自盡是陛下不能保其妃嬪矣大罪九猶曰在妃嬪也中宮有慶已經成男乃忽焉告隕傳聞忠賢與奉聖夫人實有謀焉是陛下且不能保其子矣大罪十先帝青宮四十年所與護持孤危者惟王安耳即陛下倉卒受命擁衛防維安亦不可謂無勞忠賢以私忿矯旨殺于南苑是不但仇王安而實敢仇先帝之老奴況其他內臣無罪而擅殺擅逐者又不知幾千百也大罪十一今日獎賞明日祠額要狹無窮王言屢褻近又于河間毀人居室起建牌坊鏤鳳雕龍于雲棟漢不止瑩地僭擬陵寢而已大罪十二今日座中書明日

應錦衣金吾之堂口皆乳臭誥教之館目不識丁如
魏良弼魏良材魏良卿魏希孔及其甥傅應星等濫
襲恩蔭襲越朝常大罪十三用立枷之法威詭家人
駢首畢命意欲誣陷國戚動搖中宮若非閣臣力持
言官糾正椒房之戚又興大獄矣大罪十四良卿生
員章士魁以爭煤窑傷忠賢墳脉託言開礦而致之
死趙高鹿可為馬忠賢煤可為礦大罪十五王思敬
等牧地細事責在有司忠賢乃幽置檻阱恣意撈掠
視士命如草菅大罪十六給事中周士樸執糾織監
忠賢竟停其陞遷使吏部不得專銓除言官不敢施
封駁大罪十七北鎮撫劉儵不肯殺人媚人忠賢以
不善鍛鍊遂致削籍示大明之律可以不守而忠賢
之律令不敢不遵大罪十八給事中魏大中遵旨蒞
任忽傳旨詰責及大中回奏臺省交章又再襲王言
毋論玩言官于股掌而煌煌天語朝夕紛更大罪十
九東廠之設原以緝奸自忠賢受事日以快私讐行

傾陷為事投匭設阱日夜未已片語稍違駕帖立下
勢必與同文館獄而後已大罪二十邊警未息內外
內外戒嚴東廠緝訪何事前奸細韓宗功潛入長安
偵探虛實實主忠賢司房之邸事露始去假令天不
悔禍宗功事成未知九廟生靈安賴何地大罪二十
一祖制不蓄內兵原有深意忠賢與奸相沈淮創立
內操數匿奸宄安知無大盜刺客潛入其中一旦變
生肘腋可為深慮大罪二十二忠賢進香涿州警蹕
傳呼清塵墊道人以為大駕出幸及其歸也改駕駟
馬羽幢青蓋夾護環遮則儼然乘輿矣其間入幕効
謀叩馬獻策者實繁有徒忠賢自視為何如人哉大
罪二十三夫寵極則驕恩多成怨聞今春忠賢走馬
御前陛下射殺其馬貸以不死忠賢不自伏罪進有
傲色退有怨言朝夕隄防介介不釋從來亂臣賊子
只爭一念放肆遂至不可收拾奈何養虎兕於肘腋
間乎此又寸響忠賢不足蔽其辜者大罪二十四凡

楊漣一疏指實
賊陳足被奸罔
之詔當其體而
求解于閭臣尚

不無心存顧忌
韓嶠此時使能
脅以正言喻以
利害俾早知避
禍求全縱不能
遠服刑誅或因
而得離闕廷亦
不難徐圖處置
嶠竟束手無能
付之不應致忠
賢轉計自謀泣
訴慰留直且遂
罹慘禍陰陽消
長之機爭于寸
隙而嶠庸碌寡
斷貽毒無窮雖

此逆跡昭然在人耳目乃內廷畏禍而不敢言外廷
結舌而莫敢奏聞或奸狀敗露又奉聖夫人為彌縫
更相表裏迭為呼應伏望陛下大奮雷霆集文武勲
戚敕刑部嚴訊以正國法并出奉聖夫人于外用退
隱憂臣死且不朽疏上忠賢懼甚求解于韓嶠嶠不
應遂趨帝前泣訴且辭東廠而客氏從旁為剖析
王體乾等贊之帝愾然不辨也遂溫諭留忠賢而于
次日下連疏嚴旨切責先是連疏就欲早朝面奏值
次日免朝恐再宿洩機遂于會極門上之忠賢乃得
為計連愈憤擬對仗復劾之忠賢詞知過帝不御朝
者三日及帝出羣閣數百人裹甲夾陛立敕左班官
不得奏事連乃止○當時中書舍人吳懷賢讀連疏
擊節稱嘆注其旁曰宜如韓魏公治任守忠故事即
時遣戍其奴告之忠賢即逮懷賢下獄拷掠死籍其
家質實

吳懷賢休寧
籍吳縣人

他日以忤聞去
國亦不能概為
之解免也

大雨雹

是日為

丙申

秋七月杖殺工部郎中萬燦

自楊連上疏被責廷臣益憤交章論忠賢不法給事中則魏大中許譽卿等御史則劉業楊玉珂等京鄉則太常卿胡世賞祭酒蔡毅中等勲戚則撫寧侯朱國弼南京列卿則兵部尚書陳道亨侍郎岳元聲等凡七十餘人先後申奏或專或合無不危悚激切大學士葉向高及禮部尚書翁正春請遣忠賢歸私第以塞謗帝不許燦憤抗章極論畧言人主有政權有利權不可委臣下况刑餘寺人哉忠賢性狡而貪胆粗而大口銜天憲手握王爵所好生羽毛所惡成瘡痍廢子弟則一世再世資廩養則千金萬金毒痛士

庶威加縉紳一切生殺予奪之權盡為忠賢所竊且
忠賢固供事先帝者也陛下寵忠賢亦以此乃于先
帝陵工畧不厝念間過香山碧雲寺見忠賢自營墳
墓規制宏敞擬于陵寢前列生祠又建佛宇璇題耀
日珠網懸星費金錢幾百萬為已墳墓如此為先帝
陵寢則如彼可勝誅哉忠賢竊陛下權內外止知有
忠賢不知有陛下豈可一日尚留左右疏入忠賢大
怒當是時忠賢方惡廷臣交章劾已無所發憤思借
燬立威乃矯旨廷杖一百令羣閣先至燬邸摔而毆
之比至闕下氣息纔屬杖已絕而復甦羣閣更肆蹴
踏越四日即卒御史黃尊素上言律例非叛逆十惡
無死法今以批肝瀝膽之忠臣竟殞于磨牙礪齒之
凶豎千載而下史書之豈不上累聖德亡復其故官
破格賜恤時禁中方失火李應昇復言部郎之杖血
方腥祝融之烈燄旋作天譴甚明伏冀矜恤俱不報
是年檢討丁乾學典江西鄉試發策刺忠賢忠賢怒

矯旨除其名使人詐為校尉往逮挫辱之乾學憤鬱而卒揚州知府劉鐸憤忠賢亂政書扇贈游僧有陰霾國是非句實歐陽暉詩也邏者得之遂逮治事既白會鐸家人夜醮都督張體乾誣以咒詛竟斬西市他若御史夏之令以劾毛文龍御史吳裕中以熊廷弼嫻考功郎蘇繼歐以楊連黨後軍都督府經歷張汶以被酒詆忠賢或下質實萬燦字闇夫南昌人兵獄或杖死皆繼燦被害

質實

萬燦字闇夫南昌人兵部侍郎恭之孫崇禎初

贈光祿卿官一子許譽卿松江華亭人蔡毅中字宏甫光山人陳道亨字孟起新建人丁乾學字天行浙江山陰人寄籍京師劉鐸廬陵人夏之令光山人吳裕中江夏人蘇繼歐許州人張汶邯鄲人尚書國彥

曾孫

葉向高罷

楊連劾忠賢疏既上向高謂事且決裂廷臣相繼抗
章至數十上或勸向高下其事可決勝也向高念忠
賢未易除閹臣從中挽回猶冀無大禍乃具奏稱忠
賢勤勞朝廷待厚威滿難居宜解事權聽歸私第保
全終始忠賢不悅矯帝旨叙己功累百餘言向高駭
曰此非閹人所能必有代為草者探之則徐大化也
忠賢雖憤猶以外廷勢威未敢加害有導以興大獄
者忠賢意乃決萬燬廷杖向高力救不從無何御史
林汝翥向高甥也方巡城有二豎爭奪人財物鬪于
塗汝翥笞之忠賢怒矯旨命杖汝翥如燬汝翥懼逃
之城外羣閹疑匿向高第聚而圍之大肆詬辱向高
上言國家二百年來無中使圍閹臣第者臣今不去
何面目見士大夫帝優旨慰留盡收回中使汝翥尋
出受杖韋不死向高以時事不可為乞歸已二十餘
疏至是請益力命行人護歸向高既去韓爌朱國禎
相繼為首輔未久亦罷忠賢恣意戮辱清流朝中善

類一空云 向高為人光明忠厚有德量好扶植善
類自再入相輔沖主闡人選煬電計時事日非向高
亦利方為圓然數有匡救老成持重為清流所倚賴
惟庇門生王化貞不能決議致壞封疆事為時所咎
焉

河決徐州

決魁山隄城中水深丈餘遷州治
于雲龍山而治河事無言及者
質實 魁山即奎山
在銅山縣東

南雲龍山在銅山縣南常
有雲氣蜿蜒如龍故名

封光宗選侍李氏為康妃

初帝即位降敕暴選侍凌毆聖母及妄覲垂簾狀且
云傳選侍封號以慰聖母之靈厚養選侍以敬遵皇

考之意至是忠賢亂政請加選侍封號帝從之旨與前移宮諭相背時謂前諭出自王安後諭出自忠賢故彼此抵牾帝實不辨也

發明

奸璫為選侍請封非專欲尊崇選侍也徒以當日請即位請移宮皆出自楊左主張王安調護今安已殺矣而楊左諸人忠賢又將興大獄以置之死地故先以請封選侍為反案之始奸邪陰驚其伎倆固無所不至而熹宗惜焉不察以前此明諭中外之事一任奸閹之顛倒播弄致使前後詔旨互相悖馳又何怪他日之駢戮諸臣而置若罔聞耶

冬十月罷吏部尚書趙南星左都御史高攀龍

御史崔呈秀按淮揚贓私狼籍霍邱知縣鄭延祚貪將劾之以千金賄免延祚知其易與再行千金即薦

閔望之禍至忠
賢而最烈然非
有外廷無恥之
徒為之羽翼縱
逞鬼域之計恣
豺狼之心亦不
能如此肆行無
忌乃魏廣微以
閭閻事先詣附
面目覲然在呈
秀因賦罪被糾
翼作通逃淵我
遂甘為義子醜
誠求容利千古
未有之局非但
天良盡泯真狗

之其行事類如此比還朝攀龍循故事考察盡發其
貪污狀南星議戍之詔草職候勘呈秀窘夜走魏忠
賢所叩頭乞哀言攀龍南星皆東林挾私排陷復叩
頭涕泣願為養子當是時忠賢憤廷臣交攻方思得
外廷助涿州人馮銓者少年官侍從家居與熊廷弼
有隙遺書魏良卿勸興大獄忠賢冀假事端傾陷諸
害已者得呈秀相見恨晚呈秀又言不去南星攀龍
等吾輩未知死所忠賢大以為然遂與定謀會山西
缺巡撫南星以太常卿謝應詳有清望首列以請既
得旨而御史陳九疇受魏廣微旨言應祥嘗知嘉善
魏大中出其門大中以師故謀於選郎夏嘉遇而用
之徇私當斥大中嘉遇疏辨南星攀龍極言應祥以
人望推舉大中嘉遇無私九疇妄言不可聽忠賢大
怒矯旨黜大中嘉遇并黜九疇而責南星等朋謀結
黨南星遂引罪去忠賢復矯旨切責放之歸明日攀
龍亦引去南星里居時名曰高海內仰慕與顧憲成

氣不食其餘而一時希榮倖進者流方且效尤躡踵恬然不以為羞人心敗壞至此亦可以覘其氣運之奄奄盡矣

鄒元標並稱三君及召起為吏部忤忠賢忠賢與其黨恨不已每矯敕諭必目為元山云
質實
崔秀薊州人謝應祥安福人陳九疇歷城人

十一月削吏部侍郎陳于廷副都御史楊漣僉都御史
左光斗籍

先是萬燬杖死黃尊素語漣曰可以去矣漣曰苟濟國死生以之卒不去至是廷推吏部尚書漣注籍不預于廷等推喬允升馮從吾汪應蛟上之中旨謂此次會推仍是趙南星私人顯是于廷漣光斗有意徇私更責漣怙惡不悛注籍躲閃前者勘陳九疇事俱屬漣等主張朋比不公著並削籍且追漣光斗誥命

質實

喬允升字吉甫洛陽人
汪應蛟字潛夫婺源人

以徐兆魁為吏部侍郎喬應甲為副都御史王紹徽為

僉都御史

兆魁應甲紹徽皆素為南星所損而紹徽尤黨于忠賢善類既斥三人擢用由是天下大權一歸忠賢矣

韓爌罷

初葉向高當國爌次之及楊漣劾忠賢二十四大罪忠賢頗懼求援於爌不應忠賢深銜之既向高罷爌為首輔每事持正為善類所倚然向高有智術籠絡羣奄爌惟廉直自持勢不能敵而同官魏廣微又深結忠賢偏引邪黨忠賢會推事逐趙南星高攀龍爌急率朱國禎等上言陛下一日去兩大臣臣民失望且中旨徑宣不復到閣而攀龍一疏經臣等擬上者又復更易大駭聽聞有傷國體忠賢益不悅傳旨切

責未幾又逐楊漣左光斗陳于廷朝政大變忠賢勢
益張故事閣中秉筆止首輔一人廣徵欲分其柄囑
忠賢傳旨諭曠同寅協恭而責次輔無伴食曠惶懼
即抗疏乞休畧言臣備位綸扉咎愆日積如詰戎宜
先營衛而觀兵禁掖無能紓宵旰憂忠直尚稽召還
而撈掠朝堂無能回震霆怒後先諸臣之罷斥諭旨
中出之紛更不能先時深念有調劑之方又不能臨
事執持為封還之懇皆臣罪之大者皇上釋此不問
責臣以協恭責同官以協贊同官奉詔以從事臣欲
補過無由矣乞急褫臣官為佐理溺職之戒中旨責
曠歸非干上悻悻求去聽還籍諸輔臣請如故事加
以體貌不報○曠罷時上疏謝有左右前後務近端
良重綸綍以重仕途肅紀綱以肅朝宇語忠賢及其
黨益恨曠五年七月逆黨李魯生劾曠削籍除名又
假他事坐贓二千覈其家人于獄曠
鬻田宅貸親故以償而棲止于先墓

質實

李魯生
雷化人

起崔景榮為吏部尚書

初景榮為兵部尚書數為言官所論御史方震孺請罷景榮以孫承宗代之遂引疾歸至是特起為吏部尚書時忠賢盜國柄羣小相倚附逐書趙南星欲起景榮為助比至忠賢飾大宅以待景榮不赴錦衣帥田爾耕來謁又辭不見帝幸太學忠賢欲先一日聽祭酒講議裁諸聽講大臣賜坐賜茶禮又議減考選員額汰京堂添注官景榮皆力持質實崔景榮字自不可浸忤忠賢指而不安其位矣強長垣人忤忠賢尋削籍崇禎改元復原官

十二月逮內閣中書汪文言下鎮撫司獄

文言初以布衣任俠有智術神宗末遊京師輸貲為監生用計破齊楚浙三黨先是三黨諸魁交甚密後

齊與浙漸相貳文言習知本末多方設奇間之諸人
果相疑而浙黨鄒之麟以求吏部不得見惡齊黨亦
交關其間于是齊浙之黨大離文言又交結東宮伴
讀王安與談當時流品安悅之光宗初立外廷倚劉
一燦而安居中以次行諸善政文言交關力為多及
魏忠賢殺安文言亦下吏得末減益遊公卿間葉向
高用為內閣中書韓爌趙南星楊漣左光斗魏大中
俱與往來會給事中阮大鍼與光斗大中有隙屬其
同官傅樞劾文言與光斗大中交通為奸利旨下文
言詔獄葉向高以舉用文言引罪求去忠賢終憚向
高舊臣不深究而御史黃尊素語鎮撫劉儔曰文言
不足惜不可使禍延縉紳儔頷之獄上止坐文言廷
杖除名無株及者方忠賢得樞疏喜甚欲借是羅織
東林而獄遽解志不逞乃以劉儔不任事削其籍而
用許顯純代欲再伺釁而動至是御史梁夢環知忠
賢恨未已復劾文言詔立逮之下北鎮撫司獄即命

顯純鞠治而大理丞徐大化亦希忠賢指劾漣光斗黨同伐異招異招權納賄于是東林之禍遂作

汪文言歟人阮大鍼懷寧人居桐城梁夢環廣東順德人

朱國禎罷

葉向高罷韓爌為首輔韓爌罷國禎繼為首輔魏廣微與忠賢表裏為奸視之蔑如給事中李蕃三疏劾國禎遂引疾求去忠賢語其黨曰此老亦邪人但不作惡可令善去乃加少傅賜銀幣廕子中書舍人遣行人護歸

南京地震

是日癸卯
震聲如雷

乙丑 五年春正月我

太清兵取旅順

大兵攻旅順破之守
將朱國昌等戰死
質實
旅順有關在寧海縣南一百
二十里明時海運舟達金州

衛者至
此登岸

復聽勘御史崔呈秀官

魏忠賢既得呈秀恨相見晚遂用為腹心日與計畫
至是給事中李恒茂為呈秀訟冤忠賢即以中旨復
其官尋督三殿工忠賢以閱工故日至外朝呈秀必
屏人密語移時先是顧秉謙魏廣微以已意點縉紳
便覽一冊若葉向高韓爌趙南星高攀龍楊漣左光
斗等百餘人目為邪黨而以黃克纘王永光徐大化

賈繼春霍維華等為正人進之忠賢俾據是為黜陟
已而王紹徽編東林一百八人繫以宋時淮南盜宋
江等諸名目為黜將錄令忠賢按名除退及是呈秀
復進同志諸錄皆東林黨人又進天鑒錄皆不附東
林者由是羣小無不登用善類一空云○時中旨頻
出朝瑞以為憂給事中李魯生獨上言執中者帝用
中者王旨不中出而誰出舉朝大駭呈秀既比忠賢
不二歲晉兵部尚書兼左都御史出入烜赫勢傾朝
野予時忠賢門下文臣則呈秀田吉李淳夫李夔龍
倪文煥主謀議號五虎武臣則田爾耕許顯純孫雲
鶴楊寰崔應元主殺戮號五彪他若尚書周應秋太
僕少卿曹欽程等號十狗此外又有十孩兒四十孫
之號而呈秀尤為之魁暮夜乞憐者莫不緣之以進
蠅集蟻附其門如市或不附已及勢位相抗者輒令
其黨排去諸所傾陷不可
質實
李恒茂邢臺人王永
悉數雖其黨亦畏之也
光長垣人田吉故城

人晏淳夫晉江人李夔龍福建南安人倪文煥江都人孫雲鶴霸州人楊震吳縣人崔應元大興人周應秋金壇人曹欽程江西德化人

三月我

大清建都瀋陽

先是

太祖高皇帝既得遼陽集貝勒諸臣議曰

天既眷我授以遼陽今將移居此城耶抑仍還我國耶衆俱以還國對

太祖曰國之所重在土地人民今還師則遼陽一城敵且復至據守舍已得之疆土而還後必復煩征討非計之得也且此地乃明及朝鮮蒙古接壤要區

天既與我即宜居之衆皆曰善遂定議遷都乃于天命七年

三月築城于遼陽城東五里太子河邊創建宮室名曰東京至是閱三年為天命十年三月

太祖欲

自東京遷都瀋陽與貝勒諸臣議皆曰邇者築城東京宮室既建而民之廬舍尚未完繕今復遷移又興

大役恐煩勞我國

太祖諭

曰瀋陽形勝之地西征明路直且近北征蒙古二三

日可至南征朝鮮可由清河路以進汝等寧不計及耶于是自東京至瀋陽定宮殿廟社之制是為

盛京

發明

臣等謹按自古建都立國皆以形勝為先而非

常之原必由聖人定斷瀋陽之境東盡挹婁北接扶餘南近沃海實為神皋輿區而撫定征討則明反蒙古朝鮮悉指顧可及

天眷

與完為我

大清肇基闢宇之始

太祖

高皇帝力排羣議定以獨斷規度形勢築宮闕定廟社鞏基于億萬世古稱高山天作何以過焉

以朱燮元總督雲貴州湖廣西軍務

先是貴州官軍屢為安邦彥所敗自王三善被害後賊勢益熾廷議以川師不協助宜令一人統之乃晉燮元兵部尚書總五省軍駐遵義明年賂賊黨誘殺奢寅崇明年老無能為邦彥亦乞撫燮元聞于朝許之未幾以父喪去賊又熾崇禎初起故官合諸道兵蹙之崇明邦彥俱授首

夏四月太白晝見

是月癸

未日也

重修光宗實錄

御史楊維垣首翻三案給事中霍維華繼之痛詆劉一燝韓爌孫慎行張問連周嘉模王之寀楊連左光斗而譽范濟世王志道等請改光宗實錄中旨允之免李可灼戍擢濟世巡撫志道等京卿時魏忠賢特恨東林諸人數論其罪實於三案及京察封疆事無與也羣小欲借忠賢力為報仇凡異己者概指為東林黨而去之清流

質實

給事中霍維華疏畧曰梃擊紅丸移宮三案迄無定論臣

臣為選侍之請封也請封妃也妃尚未封而況于后請之不得而況于自后不妃不后而況于垂簾前此宮不難移也王安等故難之也難之者所以重選侍之罪而張翊戴之功也神祖冊立東宮稍遲而篤愛先帝始終不渝果有廢立之謀則九閭遽密乃藉一風癘之張差乎神祖升遐先帝哀毀遽發夙疾而悠悠之口致疑宮掖豈臣子所忍言孫慎行借題紅丸誣先帝為受鳩加從哲以弑逆鄒元標鍾羽正從而

楊漣等久以抗
直為羣小所嫉
叱漣勸忠賢二
十四罪戾輩益
欲得甘心說者
或謂其平日不
宜與汪文言交
往以自貽慘禍

和之兩人立名非真晚節不振委身門戶敗壞平生
伏乞嚴諭纂修諸臣以存信史楊維垣文登人范濟
世濟源人王
志道漳浦人

六月朱延禧罷

中旨令閣票稱魏忠賢為元臣延禧
執不可御史田新阿忠賢意攻去之

逮前副都御史楊漣僉都御史左光斗給事中魏大中
御史袁化中太僕少卿周朝端陝西副使顧大章下詔
獄尋斃之削前吏部尚書趙南星等籍

先是獻汪文言獄詞連趙南星李三才及漣光斗等
二十餘人許顯純坐漣等以移宮罪徐大化獻策于

但文言結王安以贊成善政尚非自私自利視彼呈身逆閹者實有間矣文言尚無可罪之由於諸賢又何責脩當時覓題搆陷實借文言為發難之端而且巧附封疆逞其毒手以致填尸牢壁血泐交橫忠魂共抱沉冤為從來未有之奇慘至今讀之

魏忠賢曰但坐移宮則無職可指若坐納楊鎬熊廷弼賄則封疆事重殺之更有名忠賢以為然乃令許顯純復鞠文言五毒脩至使引漣等納廷弼賄文言仰天大呼曰豈世有貪賊楊大洪哉至死不承大洪者漣別字也顯純乃手作文言供狀文言復張目謂曰爾莫妄書異時吾當與面質顯純遂即斃之而具獄辭以上漣光斗各作二萬大中三千化中六千朝瑞一萬大章四萬餘復多所牽引中旨漣光斗六人逮下詔獄南星三才等俱削籍下所在撫按追贓漣光斗等先後逮至顯純非法拷掠血肉狼籍贓不肯承光斗私計曰彼殺我有二法因我不承而酷刑以斃之一也夜半令獄卒潛殺之二也承則當下法司庶有見天之日諸人然其言俱自誣服忠賢乃矯旨仍令顯純五日一追比不下法司諸人始悔失計至七月漣光斗大中同夕為獄卒所斃漣之死土囊壓身鐵釘貫耳最為慘毒光斗大中亦皆體無完膚越

猶為切齒然諸
人正氣凜然不
磨當日之推瑛
備至者孰知即
所以表章之哉

數日始報三人屍俱已潰敗不可識又踰月化中朝
瑞亦斃惟大章未死羣小謂諸人全斃無以厭人心
宜移付法司定罪明詔天下乃移大章刑部獄比對
簿大章詞氣不撓而刑部一如鎮撫原詞以移宮事
牽合封疆坐六人大辟爰書既上忠賢大喜矯詔布
告四方仍移大章鎮撫司大章曰吾安可再入此獄
呼酒與其弟大韶訣趣和藥飲之不死乃投繯而卒
初漣等被逮秘獄中忽生黃芝光彩遠映及六人畢
入適成六辨或以為祥大章嘆曰芝瑞物也而辱于
此吾輩庸有幸乎已而果然時以六人為六君子○
初汪文言之再下詔獄也鍛鍊兩月餘不屈有旨杖
之百其甥哭失聲文言叱曰孺子真不才死豈負我
哉而效兒女子相泣耶迨慘酷備加最後不能堪始
仰視許顯純曰吾口終不似汝心任汝巧為之我承
焉可也顯純誣楊左魏周諸人以贓文言蹶起曰天
乎寃哉以此蠟清廉之士有死不承楊漣之被逮也

士民數萬擁道攀號所歷卹市悉焚香建醮祈祐生還既死產入官不及千金母妻止宿譙樓二子至乞食以養徵賊令急鄉人競出貲助之至賣菜傭亦為輸助光斗前興畿輔水利尋督學政士民德之容城孫奇逢者節俠士也與定興鹿正倡義釀金諸生爭應之得金數千謀代輸緩獄而光斗已前斃正即善繼父世所謂鹿太公者也光斗死而職未竟撫按嚴追兄光霽坐累死母以哭子死都御史周應秋猶以所司承追不力疏趣之由是家族盡破後忠賢定三朝典要移宮一案以連光斗為罪魁議開棺戮屍有解之者乃免大中長子學泖以父被逮號慟欲隨行大中止之乃微服間行探刺起居既抵都邏卒四布變姓名匿旅舍晝伏夜出稱貸以完父贖未竟而大中斃學泖慟哭幾絕扶櫬歸晨夕號泣水漿不入口遂死化中前佐高攀龍發崔呈秀贓私呈秀恨之又繼連疏劾忠賢有忠賢鋌而走險其橫逞之毒將不在

縉紳而即在陛下等語忠賢益大恨因竄名獄中朝
瑞嘗請宥廷弼戴罪令守山海徐大化與之相訐大
章在刑部時識廷弼獄援議能議勞例從寬遣戍
楊維垣劾其受賄故二人並坐而大章職尤多也

秋七月削李三才顧憲成籍

三才才大而好用機權撫淮十三年結交遍天下若
顧憲成鄒元標趙南星劉宗周皆推轂三才官加至
戶部尚書以謗議故落職天啟初遼陽失欲起用不
果後起南京戶部尚書未赴卒至是御史石三畏追
論京察事詔削籍官吏部侍郎亦以京察事忤神宗
意黜去憲成既廢益講學研究名益高中外推薦無
慮百十疏乃起南京光祿少卿力辭不就未幾卒
天啟初贈太常卿亦以三畏追論與三才並削奪

實

石三畏交河人忠賢
門下十孩兒之一也

八月毀天下書院

御史張訥上疏力詆鄒元標孫慎行馮從吾余懋衡等請毀其講學書院于是元標慎行從善懋衡俱削奪東林闕中江右徽州及天下一切書院皆毀訥為忠賢鷹犬最效力忠賢深德之書院既毀未幾逆祠建質實時元標已前卒追論奪官崇禎初贈尚書謚忠介慎行尋復紅丸事遣戍從吾以病卒崇禎初復官謚恭定懋衡字國持婺源人亦于崇禎初復官張訥閩中人

以周如磐丁紹軾黃立極為禮部尚書馮銓為禮部侍郎並兼東閣大學士預機務

輔臣缺詔推老成幹濟者禮部尚書周如磐以年老推用侍郎黃立極與忠賢同鄉故援之熊廷弼之獄

紹軾與銓謀居多紹軾素憾廷弼以御史吳裕中為廷弼姻言于忠賢而杖殺之銓亦與廷弼有隙家居時曾遺書魏良卿勸興大獄及侍講筵出市刊遼東傳譖于帝曰此廷弼所作希脫罪耳帝大怒於是廷弼死遂決至是推閣臣銓資淺年未及四十忠賢黨李魯生上言成即為老而非必老乎年幹乃稱濟而即有濟于國銓遂柄用如盤閔質實周如盤莆田人三月即罷歸紹軾未踰年亦卒

黃立極字中五元

成人馮銓涿州人

魏廣微罷

楊左之獄廣微實預謀顧秉謙調嚴旨五日一追北吏部尚書崔景榮懼其立斃杖下亟請廣微諫止廣微不自安疏言連等在今日誠為有罪之人在前日實為卿寺之佐縱使贓私果真亦當轉付法司據律

論罪豈可逐日嚴刑令鎮撫追贓乎身非木石重刑之下就死直須臾耳以理刑之職使之追贓官守安勿論傷好生之仁抑且違祖宗之制疏入大忤忠賢意廣微懼急出景榮手書自明而忠賢怒已不可改乃具疏乞休不許居兩月廣微丐秉謙為解忠賢意少釋然卒不自安復三疏乞休許之既而景榮亦罷殺前遼東經畧熊廷弼傳首九邊

先是法司論廷弼獄與王化貞俱論死已而楊左諸人俱坐贓斃獄會邏者獲市人蔣應賜謂與廷弼子出入禁獄陰謀叵測忠賢遂欲連殺廷弼其黨門克新石三畏等復希旨趣之及是逆棄市傳首九邊化貞竟不誅御史梁夢環謂廷弼侵盜軍資十七萬御史劉徽謂廷弼家資百萬宜籍以佐軍中旨從之鑿資不足價姻族家俱破江夏知縣王爾玉責廷弼子韶喪珍玩不獲將槌之其長子兆珪自刎死珪母稱

寬爾玉去其兩婢衣撻之四十遠近莫不嗟憤時太倉人孫文秀顧同寅作詩誅廷弼為邏者所得二人坐誹謗俱斬連及其同郡編修陳仁錫修撰文震孟並削籍

質實

陳仁錫字明卿長州人門克新

汝陽人劉
敞清苑人

九月賜魏忠賢及客氏印

賜忠賢印文曰顧命元臣客氏印文曰欽賜奉聖夫人

發明

明代如蹇夏三楊輩曾各授印章許其密封言事故其文多有用迴愆糾繆者為一時優

異之典顧朝廷之上所言公公言之嘉謨入告雖以責望老臣而賜印秘陳苟非其人即不免開告訐之漸而況可施之婦寺乎且是時逆阉窺竊大權中外爵位黜陟一任煬竈者之主持更有何人

壅遏之而不使上聞者其不欲上聞之事固未嘗不可矯旨從中出而又何待乎賜印不過習見前朝最異之數欲畢致于其身而後快又安顧其名義之不可居也哉

冬十月罷孫承宗以高第代為經畧

初魏忠賢以承宗功高欲親附之會帝遣內官王應坤攜邊賜承宗蟒玉忠賢即令應坤申意承宗不與交一言忠賢由是大憾會忠賢逐趙南星高攀龍等承宗方西巡薊遼念抗疏帝弗省往往在講筵每奏對間有入乃請以賀聖壽入朝面奏機宜欲因是論其罪魏廣微聞之奔告忠賢曰承宗擁兵數萬將清君側公立蠶粉矣忠賢悸甚繞御牀哭帝亦為心動令內閣擬旨顧東謙奮筆曰無旨離迅地非祖宗之法違者不宥夜啟禁門召兵部尚書入令發三道飛騎止之又矯旨諭守門守闈宗承若至齊化門反接以

入承宗抵通州聞命而返忠賢遣人傾之一襪被置
輿中後車鹿善繼而已忠賢意漸解而其黨李蕃崔
呈秀徐大化等連疏詆之至比之王敦李懷光承宗
逆累疏求罷不許給事中郭興治請令廷臣議去留
論冒餉者復踵至遂下廷臣雜議吏部尚書崔景榮
持之乃下詔勉留而以簡將汰兵清餉三事責承宗
會馬世龍有柳河之敗死者四百餘人于是臺省劾
世龍并及承宗章疏數十上承宗求去益力遂許之
以兵部尚書高第代為經畧第素恇怯以關外必不
可守欲盡撤錦右諸城守禦移關內袁崇煥力爭謂
兵法有進無退錦右搖動則寧前震驚關內亦失保
障第意堅且欲并撤寧前二城崇煥曰我寧前道也
官此當死此我必不去第不能奪乃撤錦州右屯大
小凌河及松山杏山塔山守具盡驅入關委棄米粟
十餘萬軍民死亡載塗哭
質實
馬世龍柳河之敗世
聲震野民怨而軍益不振
龍以孫承宗荐為山

海總兵領中部俾南北二部俱受節制世龍定計守城頗盡力至是有降人劉伯強自耀州來言城內虛可襲世龍從之遣副將魯之甲等率師往檄水軍游擊金冠以舟濟師寇違令不至師次柳河不得渡軍陷泥淖中遂敗歿柳河亦曰楊柳河在海城縣南一里西北流入三岔河錦石即錦州右即廣寧右衛故屯也塔山堡名在錦縣西南高第字登之灤州人魯之甲里系無考本朝乾隆四十一年追謚烈愍

十二月榜東林黨人姓名示天下

御史盧承欽上言東林自顧憲成李三才趙南星而外如王圖高攀龍等謂之副帥曹于汴湯兆京史記事魏大中袁化中等謂之先鋒丁元荐沈正宗李朴賀娘等謂之敢死軍人孫丕揚鄒元標等謂之土木魔神宜一切榜示海內俾奸慝無所容忠賢大喜悉刊黨人名示天下

質實

盧承欽餘姚人

丙寅 六年春正月作三朝要典

明自國本之論
既興朝端紛數
者幾數十年實
屬無裨事體而
南司水火由此
漸起弊端況值
小人道長之時
楊所修等公然
肆臆妄談竟請
勒為成帙開局
輯修以逞其詆
毀于是羣小任
情曲直幾不憚
黑白混淆乃當

先是給事中楊所修請集提擊紅丸移宮三案章疏
倣明倫大典編輯為書頒示天下霍維華亦以為言
至是作三朝要典以顧秉謙黃立極馮銓為總裁施
鳳來楊景辰孟紹虞曾楚卿副之極意詆譏東林暴
揚罪惡其論提擊以王之案開釁骨肉為誣皇祖負
先帝論紅丸以孫慎行割不啻藥之說妄疑先帝不
得正其終更附不討賊之論輕詆皇上不得正其始
為罔上不道論移宮以楊連等內結王安故重選侍
之罪以張翊戴之功于是遂以之案慎行連為三案
罪首時方修光宗實錄凡事閤三案命即據要典以
改及書成忠賢令顧秉謙擬
御製序文冠其首刊布中外
質實 楊所修商城人施
鳳來平湖人楊景

辰晉
江人

時與倭獻媚至
欲悖擬春秋豈
知事後定評此
書即閻黨橫抗
迫崇禎初既經
焚踐而南部聚
訟楊維垣等尚
欲重翻告策中
傷善類之心無
所不至寃之是
非本自了然又
豈能以一書盡
欺後世哉

二月高第罷以王之臣代為經畧袁崇煥巡撫遼東

先是我

大清兵圍寧遠高第與總兵楊麒擁兵不救寧前參政

袁崇煥集將士誓死守盡焚城外民居搗守具入城

檄前屯及山海關凡將士逃至者悉斬人心始固

大軍戴楯穴城矢石不能退崇煥聞卒羅立發西洋巨

礮圍遂解時督屯通判金啟倬以燃礮死事聞擢崇

煥僉都御史削高第楊麒職以之臣代第以前屯總

兵趙率教代麒鎮關門尋命崇煥巡撫遼東駐寧遠

質實

王之臣潼關衛人金啟倬起小吏時為督
屯通判死光祿少卿世廕錦衣試百戶

逮前左都御史高攀龍吏部員外郎周順昌蘓松巡撫

周起元諭德繆昌期御史李應昇周宗建黃尊素攀龍

自沉于池順昌等俱下獄死

攀龍雖削籍崔呈秀恨不已亟言于魏忠賢必欲殺之順昌家居魏大中被逮過吳順昌出錢與同起卧者三日許以女聘大中孫旗尉屢趣行順昌瞋目曰若不知世間有不畏死男子周順昌耶因戟手呼忠賢名罵不絕口旗尉歸以告忠賢大怒倪文煥即希指劾順昌與罪人婚削籍昌期典湖廣鄉試程文論中引趙高仇士良寓規諷忠賢嫌之楊漣劾忠賢二十四罪疏或言昌期代草而高趙諸人去國昌期率送之郊外執手太息忠賢益大恨昌期知勢不可留具疏乞假有小璫至閣曰此人尚可留之送客耶遂傳旨落職宗建首劾忠賢目不識丁應昇尊素皆繼漣抗疏力攻忠賢應昇疏有云忠賢之罪千真萬真無可復辨千罪萬罪又不勝辨臣為陛下計莫若聽忠賢急自引退以全旦夕之命為忠賢計又莫若早

自引決以乞帷蓋之恩不然惡稔貫盈欲保首領而不可得未又切責閣臣謂君側不清焉用彼相一時寵利有盡千秋青史難欺不欲為劉健謝遷者恐并不能為李東陽倘投策求歡不幾與焦芳同傳耶時魏廣微方深結忠賢知應昇譏已調旨切責而尊素尤有智慮為羣小所深忌曹欽程希指劾宗建應昇尊素為東林護法皆削籍會吳中訛言尊素欲效楊一清誅劉瑾用撫杭織造李實為張永授以秘計忠賢大惧遣刺事者至吳凡數輩侍郎烏程沈演家居記忠賢日事有迹矣于是忠賢益遣使譙訶實知實與前巡撫起元素有隙蓋起元撫吳時公廉愛民絲泉無所取實素貪橫妄增定額巡誅求又惡同知楊姜不屈已具疏誣劾起元為姜辨寃並劾實不法數事實以此歛威而銜起元不置至是忠賢乃索取實空印白疏令李永貞偽為實奏誣劾起元為巡撫時乾沒帑金十餘萬日與攀龍輩往來講學因竄入順

昌等名矯旨並逮之攀龍聞旗尉將至謁道南祠為
文以告歸興二門生一第歛後園池上及暮書遺表
訖具衣冠自沈于池表云臣雖削奪舊為大臣大臣
受辱則辱國謹向北叩頭從屈平之遺則遠近聞其
死莫不傷之順昌故有德于鄉士民聞其被逮憤怒
號冤開讀日不期而集者數萬咸執香為周吏部請
命旗尉厲聲罵曰東廠逮人鼠輩敢爾大呼因安在
手擲銀鐙于地聲琅然衆益憤曰吾始以為天子命
乃東廠魏太監耶遂蠶擁上勢如山崩旗尉東西竄
衆縱橫毆擊立斃一人餘負重傷踰垣走巡撫毛一
鷺不能發一語知府寇慎吳縣知縣陳文瑞素得民
曲為解諭衆始散順昌乃自詣吏是日旗尉往浙江
逮尊素者泊舟胥門外市人知城中有變繫其舟而
沈之旗校汨水以遁失駕帖不敢往尊素聞即囚服
自投詔獄順昌既就逮一鷺飛章告變東廠刺事者
言吳人謀斷水道劫漕舟忠賢大懼已而一鷺言縛

得倡亂者顏佩章楊念如周文元馬傑沈揚亂已定忠賢乃安然自是緹騎不敢復出國門矣方諸臣之被逮也顧秉謙忽持正請付法司論罪忠賢不從已而昌期先至慷慨對簿詞氣不撓坐贓三千備受五毒不勝酷刑時四月晦日索贖中傳出片紙自此遂斃至五月二日獄卒以死報終莫知為何日其殮也十指墮落掬置兩袖中蓋以其為連代草故云順昌宗建應昇尊素繼至許顯純各坐贓數千宗建至一萬三千五日一酷掠順昌輒大罵忠賢顯純椎落其齒順昌啖血唾顯純面罵益厲遂于夜中潛斃之時六月十七日及領埋已越三日皮肉皆腐僅存鬚髮宗建為顯純酷訊偃卧不能出聲顯純罵曰尚能詈魏公一丁不識否以沙囊壓之而死時六月十八日尊素知獄卒將害已叩首謝君父賦詩一章時獨應昇尚在尊素隔牆呼之曰仲達我先行矣遂死時為閏六月朔日明日應昇亦死起元道遠至則順昌等

已俱死顯純酷加撈掠竟如疏懸賊十萬罄貲不足
親故多為破家及九月亦斃之獄中時以順昌等慘
死詔獄與前楊左諸人先後畧同遂與高攀龍並稱
為後七君子以配楊左等共十有三人為逆閹時死
節之最著者云攀龍學本濂洛操履篤實涵養邃密
粹然為一代大儒既死呈秀憾猶未釋矯旨下其子
世儒吏刑部坐世儒不能防閑其父謫為徒順昌就
逮時諸生朱文祖間行詣都為納鱸粥湯藥及微贖
令急奔走稱貸諸公間順昌觀歸文祖哀慟發病死
其所捕顏佩葦等五人比臨刑語知府冠慎曰公好
官知我等好義非為亂也延頸就刃而死後吳人合
墓之虎邱傍題曰五人之墓昌期應昇至常州開讀
知府曾櫻咸助之貲應昇師吳鍾鑾詣府署與應昇
語竟日謂應昇曰昔蔡元定竄道州晦翁餞之蕭寺
微視元定不異平時何圖今日親見此景真一夕千
古已而忽聞署外有數千人闐聲皆言忠臣何故被

逮櫻素有惠政得民力為勸諭始解散而諸校方怖
蕪州事有越垣而仆者適賣蔗童子過之曰我恨極
惜不能殺汝即取削蔗刀割片肉而去宗建死後所
親蔣英代為輸贖亦坐削籍尊素家尤貧坐賊雖不
及三千同年門舊及鄉人咸助之始得完趙元方撫
吳罷歸順昌為文送之指斥無所諱議者謂起元順
昌之禍已伏于此及兩人質實道南祠即揚龜山祠
死吳中士民無不垂涕者周茂蘭字子佩順昌
長子曾櫻字仲含峽江人本朝乾隆四十一年追
謚忠節吳鍾鑾字鑾稚武進人蔣英嘉善人沈演即
淮之弟

兵科給事中羅尚忠疏陳漏餉剝軍弊

尚忠言各邊解銀往領銀回者或各衛鑽求情分委
放軍糧或將領轉委偏俾遽相抽扣而將官遇有司

餉之權者雖品位過之亦甘卑禮厚幣甚至星相游
人當事荐往者亦派扣各軍禮而歸之又甚有將官
放債倍扣利息者及管庫司官以情面淺深幣交厚
薄為各邊發糧之先後乞飭各督撫委各邊道將查
明軍數軍若干餉若干刻成冊各送計部計部總計
九邊額兵若干歲餉若干彙冊進覽一送該部一送
各司俾奸書無所去其籍得旨所言給餉
情弊甚悉其應裁應禁逐議尋不果行

三月設各邊鎮監軍內官

時各邊鎮增設內臣監軍太監劉應坤鎮守山海
關大學士丁紹軾兵部尚書王永光等屢諫不聽

發明

熹宗之時邊事已不可為經撫不和疆場日
蹙朝廷即力加整飭尚恐不能有濟而乃復

設內官監軍以益其弊是猶抱薪而救火也往時
內官典兵如曹吉祥郭敬輩覆轍俱在惟嘉靖力

抑宦侍其鋒稍挫神宗時雖監稅肆出而典兵者尚少至是魏闢亂政一切魁柄皆欲歸其同類始則借犒軍以刺事閹庭供役士卒愁苦繼乃各設監軍牽制邊將稍一拂逆戮辱隨之疆事如此國事又如此岌岌殆哉其能久乎

夏四月搜括應天各府貯庫銀

命南京守隘內臣搜應天各府貯庫銀充殿工及兵餉

五月王恭厰災

王恭厰火藥局也是日雷震火藥自焚地中霹靂聲不絕煙塵障空白晝晦冥軍民昏仆死者無算未幾

朝天宮

又災

六月地震

先是五月薊州密雲連震三日及是京師天津宣大山東河南皆震

閏月建魏忠賢生祠

建祠之請始自
潘汝楨踵效者
遂遍及天下且
上自宗藩下逮
賈豎無不思以
此為逢迎諂媚
之端廉恥道喪
盡矣甚至像加
褒貶制擬九極
舉國皇皇狂走

忠賢生祠之建始于潘汝楨汝楨巡撫浙江疏請建
忠賢生祠于西湖織造太監李寶請令杭州衛百戶
守祠詔賜祠額曰普德勤石記功德閣臣撰文書丹
自是諸方效尤幾遍天下薊遼總兵閻鳴泰部內建
祠七所費數十萬其頌忠賢有民心依歸即天心向
順語開封毀民舍二千餘間創宮殿九楹儀如帝者
巡撫朱童蒙建祠延綏用琉璃瓦劉詒建祠薊州金
像冕旒其諸祠務極工作之巧像皆以沈香木為之
眼耳口鼻宛轉如生人腹中腸肺俱以金玉珠寶為
之髻空穴其一以替四時香花一祠木像頭稍大小

盡如喪狗而頌
辭至稱以堯舜
聖神美其依歸
向順竟不知視
忠賢為何等其
居心妄悖直宜
與叛逆同科而
顧秉謙等復敢
矯傳褒答偶麗
盈篇推其積應
蓄謀又將何所
不至乃後此按
錄逆黨若輩均
得倖逃顯戮何
以嚴刑懲而示防
維縱惡之機崇

豎上冠不能容匠人恐急削而小之以稱冠小豎抱
頭痛哭責匠人凡疏辭掄揚一如頌聖稱以堯舜
德至聖至神閣臣輒用駢語褒答督餉尚書黃運泰
迎忠賢像五拜五稽首稱九千歲都城內外祠宇相
望有建于東華門外者工部郎中葉憲祖曰此天子
臨辟雍道也土偶能起立乎忠賢聞之即削其籍初
汝楨請建祠巡按御史劉之待會稿遲一日即削籍
而薊州道胡士容以不具建祠文遵化道耿如杞以
入祠不拜皆下獄論死時海內望風獻媚自督撫巡
按而外宗室若楚王華娃勲戚若武清侯李誠銘保
定侯梁世勲等廷臣若尚書卞輔忠詞臣若庶吉士
一若琳郎郎若郎中魯國楨諸司若通政司經歷孫
如列上林監丞張永祚等亦皆建祠恐後下及武夫
賈豎諸無賴子莫不攘臂爭先洵洵若不及最後巡
撫楊邦憲建祠南昌至毀周程三賢祠益其地鬻澹
臺滅明祠曳其像碎之比疏至熹宗已崩莊烈帝且

積亦不能無責矣

閱且笑忠賢覺其意具疏偽辭輒報允無何忠賢誅諸祠悉廢凡建祠者概入逆案云

質實

汝

積桐城人劉詒杞縣人黃運泰永城人葉憲祖字美度餘姚人劉之待興國州人胡士容黃州廣濟人耿如杞字楚材館陶人李誠銘慈聖太后姪梁世勲瑞之後邵輔忠定海人李若琳大興人魯國禎臨川人馮銓罷

銓以媚事魏忠賢登宰輔素與崔呈秀暱呈秀欲入閣其黨孫杰霍維華嗾職方郎中吳淳夫力攻罷銓又慮王紹徽為吏部不肯推呈秀令御史袁鰲攻罷紹徽而杰等慮忠賢意變復以計沮之自是羣小携貳

質實

袁鰲湖廣龍陽人

京師大水江北山東旱蝗

欽定四庫全書

御定資治通鑑綱目三編

三

秋七月以施鳳來張瑞圖李國楷俱為禮部尚書兼東

閣大學士預機務

鳳來素無節概及在閣惟以和柔自媚于世瑞圖于諸事迎合魏忠賢意忠賢建祠碑文多出其手書詔旨褒美忠賢詞極駢麗皆瑞圖筆也國楷去釋褐纔十四年忠賢以同鄉故援之

質實

張瑞圖晉

江人李國楷高陽人

九月庚午朔我

太宗文皇帝嗣位以明年為天聰元年

八月我

太祖高皇帝崩大貝勒代善于諸子中為最長而我

太宗文皇帝時稱

四貝勒功德隆茂為眾望所屬代善因作議書言紹承大統得聖君始能戡亂致治以成一統自顧德薄願共推戴

四貝勒嗣位入朝過示諸貝勒大臣眾皆喜

太宗辭讓再三代善意益懇切乃從之是年冬遣使遺表崇

煥書曰爾爾停息干戈遣李喇嘛等來弔喪並賀新君即位爾爾循聘問之常我亦豈有他意既以禮來當以

禮往故遣官致謝至兩國和好之事前

皇考往寧遠時曾致璽書與爾爾令爾轉達至今尚未回答汝

主如答前書欲兩國和好我當覽書詞以復之而國通好誠信為先爾爾須實吐衷情勿事支飾也

顧秉謙罷

自秉謙為首輔凡魏忠賢傾害忠良皆屬其票擬三朝要典之作秉謙為總裁是非舛謬特甚及是羣小

各有所左右同黨中如魏廣微馮銓輩日夜交軋秉
譙不自安遂乞歸○東謙于崇禎初削籍尋入逆案
論徒家居又為卿黨所惡聚衆慘辱之屋室資財
焚掠殆盡秉謙竄漁舟得免久之寄居他縣以死

冬十月進魏忠賢爵上公從子良卿寧國公

先是皇極殿成帝御殿受賀忽有聲如怒濤自殿中
出羣臣班亂至是三殿告成太監李永禎奏魏忠賢
功吏部尚書周應秋亦奏如永禎言忠賢遂進上公
加恩三等良卿前已封肅寧伯進侯至是復進封公
己而諸邊築隘口成南京孝陵工竣甘肅奏捷法司
捕盜並言忠賢區畫方畧詔書褒美閣臣皆擬九錫
文半歲中歷錦衣指揮使十七人同知三人僉事一
人擢其族孫希孟希孔等世襲都督同知甥傳之琮
馮繼先俱都督僉事章奏無巨細輒頌忠賢稱殿臣
不名山東奏產麒麟大學士黃立極等稟旨言殿臣

修德故仁獸至其誣罔若此故事內官為司禮秉筆
非公事不得出忠賢每歲必數歷畿甸坐文軒駕四
馬笙鼓鐃吹之聲轟隱黃埃中錦衣玉帶鞞袴而握
刀者夾車左右而行自厨傳優伶蹴踘興皂隨者動
以萬數嘗自琉璃河祭水還歷西山碧雲寺士大夫
皆遮道拜伏凡有章奏其黨遣急足馳請然後下客
氏既朝夕侍帝所而每數日必出至私第輿過乾清
宮前竟不下客氏盛服倩粧儼同妃后侍衛赫奕照
耀衢路至宅則老祖太太千歲之聲喧呼震地攜賚
銀幣無算或數日不返忠賢促之始入凡忠賢濁亂
朝政毒痛海內皆
客氏為內主也

十二月南京地震

先是寧夏地大震
至是南京地亦震

七年春正月以太監崔文昇總督漕運河道

文昇先侍光宗藥為廷臣所論已放南京魏忠賢作三朝要典遂召還至是命兼督河道文昇之任即多參劾忠賢矯旨稱其能力挽漕運盡心國儲深體厥臣籌邊至意嘉之被叅者削籍治罪

二月召王之臣還

先是袁崇煥與滿桂不協請移之他鎮乃召桂還王之臣代高第為經畧又奏留桂崇煥又與不協中朝慮債事命之臣專督關內以關外屬崇煥畫關而守崇煥慮廷臣忌已上言陛下以關內外分責二臣用遼人守遼土且守且戰且築且屯屯種所入可漸減海運其大要堅壁清野以為體乘間抵隙以為用戰雖不足守則有餘守既有餘戰無不足顧奮迅立功衆人必忌任勞則必召怨蒙罪始可有功怨不深則

勞不著罪不大則功不成謗書盈篋毀言日至從古已然惟聖朝興廷臣始終之朝議以崇煥之臣不相能召之臣還罷經畧不設以關內外盡屬崇煥并便宜從事

大清兵征朝鮮

崇煥與趙率教巡歷錦州大小凌河議大興屯田漸復高第所棄舊土會

大清兵方討朝鮮渡鴨綠江崇煥乘間遣將繕錦州中左大凌三城未畢朝鮮及毛文龍同告急朝命崇煥發兵往援崇煥以水師援文龍又遣率教等九將將精卒逼三岔河為牽制之勢而朝鮮已為

大清所服諸將遂引還

勒太康伯張國紀回籍

國紀皇后父也。后性嚴明，見魏忠賢及客氏亂政，數于上前言之。客魏交恨，一日帝至后宫，后方讀書，帝問何書，對曰：「趙高傳也。」帝嘿然而出。忠賢聞之，益恨。曾有張匿名榜于厚載門者，列忠賢反狀及其黨七十餘人，忠賢疑國紀為之，卽輔忠孫杰欲因此興大獄，借國紀以搖中。官事成，則立魏良卿女為后，草一疏募人上之。諸人慮禍不敢承，順天府丞劉志選年老而嗜進，無厭感家人言，謂己老必先忠賢死也。竟上之疏，中極論國紀罪末言毋令人訾及丹山之穴。藍田之種，蓋忠賢嘗誣后非國紀女，故云疏上事。巨測帝無所問，但令國紀自新而已。忠賢意大沮，梁夢環偵知之，復深論志選疏，且故誥丹山、藍田二語。忠賢將從中究其事。大學士李國楷及王乾交沮之事乃止。而國紀竟勒歸故郡。

遣瑞王常浩及惠王常潤、桂王常瀛之藩。

三王皆帝叔父魏忠賢潛蓄逆謀不利其在內御史張訥希旨即疏趣之藩于是三王以次就國儀物禮數刻意貶損羣小反盛稱忠賢節費為國帝即下詔褒美質實瑞王常浩神宗第有三王並封之旨謂光宗福王及帝浩也尋以羣臣爭遂寢二十九年東宮立與福惠桂三王同日封常洵以長先之藩至是常浩之藩漢中惠王常潤神宗第六子至是之藩荊州桂王常瀛神宗第七子至是之藩

衡州

夏四月逮前刑部侍郎王之案下獄死

劉志選疏頌要典言命德討罪無微不彰即充舜之放四凶舉元愷何以加焉且云慷慨憂時力障狂瀾于既倒者魏廣微也當還之揆席以繼五臣之盛事赤忠報國弼成巨典于不刊者殿臣也當增入簡端

以揚一德之休風又言王之案宜正典刑孫慎行宜加遣戍忠賢矯旨逮之案下詔獄坐以賊八千竟瘦死慎行亦遣戍寧夏知府曾櫻故緩之未行而忠賢敗王之案于天啟初上復仇疏中言梃擊之謀變而為用藥之術蓋梃不中而藥促之是文昇之藥慘于張差之梃孫慎行辨析紅丸有曰由前則過信可灼有輕進之罪由後則曲宥可灼有不討賊之罪兩者皆無可逃其言峻直故羣小俱恨之刺骨

發明

逆阹亂政流毒縉紳一時呈身獻媚之徒借其力以翻三案遂至顛倒是非判為要典而

劉志選者乃復劾逮之案瘦死圜扉煽鼓推波莫茲為甚顧志選耄悖嗜進揣風燭之將殘冀冰山之可恃卒之十罪朝彈元凶暮竄曾不踰年而身膺顯謬為逆案之罪魁所謂孽不可追者其志選之流乎

聞叔偕肆至忠
賢而已極一時
趨承諸事幾于
翻覆亂常陸萬
齡繼兩成均竟
敢以忠賢上配
孔子彼亦居然
人面而昧良忘
本直是犬豕不
如林軒塗抹掛
冠尚能稍扶名
教乃朱之俊配
顏師儒之席公
然奏請施行實

五月監生陸萬齡請祠魏忠賢于國子監

萬齡請以忠賢配孔子忠賢父配啟聖公其疏曰孔
子作春秋厥臣作要典孔子誅少正卯厥臣誅東林
黨人禮宜並尊持疏詣司業林軒軒援筆塗抹即夕
挂冠櫺星門去司業朱之俊為奏請從之軒坐削籍
同時又有一張生者欲上疏以忠賢與質實
孔子並尊入國學自稱見子路擊之遂殂質實
字實林軒
南同
安人

秋七月遣魏良卿享南北郊祭太廟

上不豫以錦州之捷遣良卿告南郊北郊及太
廟代行禮于是天下皆知忠賢欲竊神器矣

發明

國家郊廟重典必躬必親昭其敬也嘉靖時
祈穀明堂嘗遣武定侯郭勛恭代識者已譏

乃斯文道喪然
當時寡廉鮮恥
之徒取悅奸瑤
者忍于蔑視君
上又豈特無禮
于先師哉

其非禮乃良卿以魏忠賢之孽儼然攝行大祀對
越于兩郊九廟之間其僭妄孰甚焉且寧遠錦州
之役滿桂僅以身免盈庭藉藉方爭劾袁崇煥之
不能救援顧在督師則明斥為罪在內豎則詭冒
為功甚至晉秩太師良卿倍邀優叙馬鹿混淆謬
以捷告豈果謂天祖之可欺耶蓋是時忠賢懷奸
莫測特欲假托遼功令其兄子得因代祭以干帝
制逆志之萌于前具見又何待傳呼呈秀私語密
謀而後覺其有覲
覲神器之心耶

罷袁崇煥以王之臣代之

時我

太宗文皇帝親督兵至大凌河守城士卒皆遁遂進圍錦州

太監紀用總督趙率欽遣使請和我

大清遣書責之袁崇煥令祖大壽等統精兵四千統出

大清兵後別遣水師東出相牽制大壽等未至
大清已分兵抵寧遠城下崇煥督將士登陴列營濠內
用礮拒擊而滿桂亦率尤世威以兵來赴我
大兵疾馳追擊大敗之追至城下尸填壕塹皆滿昇解
寧遠圍復益兵攻錦州以潺暑不能克毀大小凌河
二城而還魏忠賢使其黨劾崇煥不救錦州崇煥乞
休去以王之臣代之及論守寧錦功文武冒濫增秩
賜廕者數百人崇煥止增一秩先是尚書霍維華嘗
進仙方靈露飲于帝帝飲而甘之已漸厭及得疾體
腫忠賢以咎維華維華懼甚慮帝不測有後患欲先
自貳于忠賢會寧錦叔廕維華請以
讓崇煥魏忠賢覺其意降旨頗厲

封魏忠賢從孫鵬翼為安寧伯加少師從子良棟安東
侯加太子太保良卿加太師

良棟鵬翼尚在襁褓鵬翼以寧錦奏捷封良棟以殿工封從吏部尚書周應秋請也

八月帝崩遺詔皇五弟信王嗣位

帝疾大漸召閣部科道諸臣于乾清宮諭以魏忠賢王體乾皆恪謹忠貞可計大事黃立極對曰陛下任賢勿貳諸臣敢不仰體及崩遺詔以弟信王嗣位王即夕入居宮中羣臣于比明始至方入臨內使十餘人轉呼崔尚書甚急呈秀入與忠賢密謀久之語秘不得聞或云忠賢欲篡位呈秀以時未可止之也

質實

信王諱由檢光宗第五子天啟二年封信王

信王由檢即位赦

是為莊烈帝以明年為崇禎元年

忠賢紊亂朝常明之元氣股削已盡無宗至是尚子襲焉可謂至死不悟然當時召見諸臣原不過為若輩所欺指此以觀舉朝意向至云忠賢可計大事則其假詞制衆逆謀窺竊顯然獨

以呈秀秘計時
未可行兼意信
王年尚未冠與
亦如熹宗之易
與不妨隨時取
濟耳若以慈惠
嗣位為羣小真
心推戴何異癡
人說夢

九月追謚母賢妃劉氏為孝純皇太后

初入宮為淑女萬歷三十八年十二月生莊烈帝已
失光宗意被譴薨光宗中悔恐神宗知之戒掖庭勿
言葬于西山及莊烈帝長封信王追追賢妃往者莊
烈帝問近侍曰西山有劉娘娘墳乎曰有每密附金
錢往祭及即位上尊
質實
劉太后海州
謚曰孝純皇太后
人後籍宛平

立皇后周氏

天啟中后選入信卽時神宗劉昭妃攝太后實宮中
之政悉稟成于熹宗張皇后故事宮中選大婚一后
以二貴人陪中選則皇太后幕以青紗帕取金玉跳
脫繫其臂不中卽以年日帖子納淑女袖袖以銀與
遣還張后疑后弱昭妃曰今雖弱後必質實周皇后
長大因冊為信王妃帝即位立為皇后
質實
蘇州人

徙居大興生員奎之女奎後封嘉定伯

賜李莊妃弟成棟田

莊妃李氏即所稱東李者也仁慈寡言笑位居西李前而寵不及莊烈帝幼失母育于西李既而西李生女光宗改命東李撫視天啟元年二月封莊妃客魏用事惡妃持正宮中禮數多被裁損憤鬱而薨至是帝立詔賜妃弟成棟田產念撫育恩也

冬十月南京地震

震自西北迄東南隆隆有聲

十一月放魏忠賢于鳳陽道死詔磔其屍

魏閭流毒貫盪
中外切齒一時
工寮俯首莫敢
誰何其尤甚者
方且呈身義死
播惡于衆邪競
之熾實自古所
僅見迨莊烈嗣
位既已洞燭其
奸庶幾一快神
人之憤若給事
楊所修前此請
輯三朝要典原
屬逆黨推波助
瀾之人至是始
識冰山難恃猶

帝素稔忠賢惡深自微備及即位其黨自危楊所修
楊維垣先劾崔呈秀用以嘗帝時呈秀丁母憂奪情
視事不用絛經所修請令呈秀守制維垣繼攻之呈
秀罷歸于是主事錢元愬遂劾忠賢上言忠賢本梟
獍之資先帝假以事權羣小蟻附稱功頌德布滿天下
如王莽之妄引符命列爵三等畀及乳臭如梁冀之
一門五侯偏植奸黨分置要津如王行之狡兔三窟
與珍輦寶藏聚肅寧如董卓之郿塢自固廣開告訐
誅鋤士類如曹節王甫之鉤黨株連陰養死士陳兵
自衛如桓溫之壁後置人皇上待以不死宜勒歸私
第魏良卿等有玷茅土並宜褫革員外史躬盛主事
陸澄源亦交章論之而嘉興貢生錢嘉徵更劾忠賢
十大罪一曰並帝內外封章必先關白稱功頌德上
配先帝及奏俞旨必曰朕與厥臣自古未聞有此奏
體二曰蔑后皇親張國紀于御前面折逆奸遂遭羅
織欲置之死賴先帝神明祇膺薄懲不然皇親危則

觀望遠近姑効
呈秀以膏帶蓋
明季士大夫波
流之習浸淫日
久其為門戶擊
排者固涉客氣
虛驕下此則一
味說隨因時起
倒而已其真能
持正嫉邪者自
周宗建楊迪諸
人而外固指不
多屈真士林之
耻也

中宮危矣三曰弄兵祖宗朝不聞內操忠賢外脅臣
工內逼宮闈操兵禁中深可寒心四曰無二祖列宗
高皇帝垂訓中涓不許干預朝政乃忠賢一手障天
流毒縉紳凡邊腹重地潛運咽喉多置腹心意欲何
為五曰剋削藩封三王之國莊田賜賚甚薄也而忠
賢封公侯伯之土田膏腴萬頃六曰無聖先師為萬
世名教主忠賢何人敢祠大學之側七曰濫爵古制
非功不侯忠賢竭天下之物力佐成三殿居然襲上
公之爵覲不知省八曰掩邊功遼佐用兵以來墮名
城殺大將而冒侯封伯九曰傷民財郡縣請祠遍天
下一祠所費不下五萬金猷骨剝髓孰非國家之脂
膏十曰棄名器崔呈秀之子鐸目不識丁賢書遂登
前列疏上帝召忠賢使內侍讀之忠賢震恐喪魄急
以重寶啗信邸太監徐應元求解應元故忠賢博徒
也帝知之斥應元安置忠賢于鳳陽榜其惡示天下
尋曰逆惡醜忠賢擅竊國柄誣陷忠良罪當死姑

從輕發鳳陽乃不思自懲素蓄亡命之徒環擁隨護
勢若叛然令錦衣衛逮治忠賢行至阜城聞之與其黨
李朝欽偕縊死乃磔其尸懸首河間呈秀聞忠賢死
亦自縊明年追戮其屍○時言者劾呈秀為五虎之
首宜肆市朝有詔逮治籍其家呈秀聞之列姬妾羅
珍寶呼酒痛飲盡一卮即擲壞之飲已自縊詔開棺
追戮其屍其子鐸覆質實錢元愬歸安人史躬盛烏
試僅得二義削籍
程人陸澄源平湖人戍邊

罷諸邊鎮守中官

天啟六年三月各邊俱增設內官鎮守至是帝諭兵
部先朝于宣大薊遼東江之地分遣內臣協鎮一柄
兩操甚為無謂且宦官觀
兵自古有戒其槩罷之

免天啟時逮死諸臣賊釋其家屬

黃立極罷

山陰監生胡煥猷上疏論黃立極施鳳來張瑞圖李國楷等身居揆席一意媚閹並宜斥罷立極等疏辨帝猶優詔報之及是立極終不自安乞休去時楊維垣等交章論煥猷疑東林指使請按問乃詔除煥猷名

發明

黃立極等以逆閹黨人夤緣政府進奸肆惡靡所不為逆閹既誅其黨自應罷斥乃大臣

不為舉發言官不聞論奏而糾劾之疏且出自一山陰監生則諸臣平日封章交論相與水火者徒知爭門戶之私而于國家進賢退不肖之義曾不涉其胸臆也莊烈帝深知立極革之附奸特不欲驟斥衆臣故為除煥猷名以安其意而楊維垣等乃疑其為東林指使請按問是時逆閹雖誅逆案

未定故猶以東林為罪惡之歸小人變亂黑白何所不至乃鼎象已昭而魑魅猶不自覺亦可哀也

夫

十二月以錢龍錫李標來宗道楊景辰黃道登劉鴻訓並為禮部尚書兼東閣大學士預機務

帝舜官占箴志之語所以訓禹辭位非謂辨論官材必當取信

于神也後世乃沿襲為金甌擇相故事夫探枝夾箸思欲得真

帝以施鳳來輩皆忠賢所用不足倚詔廷推閣臣倣古枚卜典名九卿科道入乾清宮貯名金瓶焚香肅拜以次探之得龍錫標宗道景辰輔臣以天下多故請益一二人復得道登鴻訓並命入閣

質實

錢龍錫字稚文松江華亭人李標字汝立高邑人來宗道蕭山人黃道登吳江人劉鴻訓字默成長山人

追復熹宗成妃李氏裕妃張氏封號

材于摸索暗中
之間其為可笑
更何待言

客魏肆惡日幽成妃別宮不死斥為宮人裕
妃幽別宮絕飲食而死至是俱追復封號

客氏及魏良卿侯國興等伏誅

先是熹宗崩客氏將出外宅氏于五更赴梓宮前出
一小函用黃色龍袱包裹皆熹宗胎髮痘痂及累年
落齒剃髮痛哭焚化而去及是詔赴浣衣局掠死籍
其家良卿國興與客光先等皆棄市家屬無少長皆
斬嬰孩赴市有耽睡未醒者人以為慘毒之報莫不
快之方客氏之籍也于其家得宮女姪身者八人蓋
將效呂不韋所為帝
大怒命悉皆殺之

御定資治通鑑綱三編卷三十三

欽定四庫全書舊要卷七千四百四十六

史部

御定資治通鑑綱目三編卷三十四

起戊辰明莊烈崇禎元年
盡庚午明莊烈崇禎三年 凡三年

戊辰 莊烈帝崇禎元年春正月詔中官非奉命不得出禁

門

帝懲魏忠賢禍乃有是詔尋又申
廷臣交結內侍之禁頒諭諄戒之

尊熹宗皇后為懿安皇后

三月葬德陵

諡曰達天開道敬孝篤友章文襄
武靖携莊勤慈皇帝廟號熹宗

質實

德陵在昌平
州雙鎖山楹

子峪西南距

永陵一里

明史贊曰明自嘉靖而後綱紀日以陵夷神宗末廢
壞極矣雖有剛明英武之君已難復振而重以帝之
昏庸婦寺竊柄濫賞濫刑忠良慘
禍億兆離心雖欲不亡何可得哉

天赤如血

是月辛巳昧爽也占者
云是主大旱且兵徵

施鳳來張瑞圖罷

鳳來等積惡已
深元實久列諫
垣前此何以喋
無一語窺其意

鳳來素無節槩以和柔自媚於世瑞圖務迎合魏忠
賢會試發策言古之用人者初不設君子小人之名

過懼閣缺方
遂爾依違洪
心直至羣奸距
始欲藉一疏
以沽直名殊為
鄙迨瑞圖既
一劾罷而定逆
亦時閣臣尚以
其無實狀為詞
以見當時廷臣
術壞盡祖庇
回行其私意即
所彈亦非出公
心世風凌替極
矣

分別起於孔子其謬妄如此忠賢生祠碑文多出其
手書詔旨褒美忠賢詞極駢麗皆瑞圖筆也至是御
史羅元賓疏劾鳳來等畧論綸綍之重任總歸閣官
之權衡欲上公則尚公欲封爵則封爵欲建祠則建
祠欲誅殺則奪則誅殺則奪情面多而擔當少爵祿
重而謀國輕遂使黃罪為置郵之所輔臣若執簿之
官悞國徇私莫此為甚帝是
質實
羅元賓
會稽人
其言鳳來瑞圖遂俱乞罷

贈卹冤陷諸臣

諸忤忠賢致死若楊漣左光斗魏大中周朝瑞袁化
中顧大章周起元繆昌期周順昌周宗建黃尊素李
應昇萬燝皆贈官錄一子王之采復官丁乾學吳裕
中劉鐸吳懷賢蘓繼歐張汶亦獲贈卹詔死禍尤烈
者并予諡而是時姚希孟以詞臣持物論雅不善光
斗宗建力尼之遂多不獲諡給事中瞿式耜頌諸臣

完稱漣大順昌為清中之清忠中之忠乃諡漣忠烈
大中忠節順昌忠介既而趙南星鄒元標高攀龍馮從

吾並贈

質實

楊漣贈太子太保兵部尚書左光斗贈右
官賜諡都御史魏大中周順昌贈太常卿周朝瑞

贈大理卿周起元贈兵部右侍郎繆昌期贈詹事魚侍
讀學士袁化中顧大章周永建黃尊素李應昇贈太僕

卿萬燦贈光祿卿福王時追諡光斗朝瑞宗建應昇忠

毅化中忠愍大章裕愍起元忠惠昌期文貞尊素忠端

燦忠貞丁乾學贈侍讀學士劉綽贈太僕少卿吳懷賢

贈工部主事蕪繼歐贈太常卿吳裕中張汝贈卿有差

趙南星贈太子太保諡忠毅鄒元標贈太子太保吏部

尚書諡忠介高攀龍贈太子少保兵部尚書諡忠憲馮

從吾贈太子太保諡恭定瞿式耜字起由常熟人

明桂王時殉節本乾乾隆四十一年追諡忠宣

夏四月以袁崇煥督師薊遼

初崇煥以忤忠賢去忠賢既伏誅廷臣爭請召崇煥至是進兵部尚書督師薊遼兼督登萊天津軍務所司敦迫上道比至都帝召見平臺容以方畧對曰臣受陛下特眷願假便宜計五年全遼可復帝退少憇時廷臣咸在給事中許譽卿叩以五年之畧崇煥言聖心焦勞聊以是相慰耳譽卿曰上英明安可漫對異日按期責效奈何崇煥慨然自失頃之帝出即奏言東事本不易竣陛下既委臣臣安敢辭難但五年內戶部轉軍餉工部給器械吏部用人兵部調兵選將須中外事事相應方克有濟帝為飭四部臣如其言崇煥又言以臣之力守全遼有餘調衆口不足一出國門便成萬里忌能妬功夫豈無人即不以權力掣臣肘亦能以意見亂臣謀帝起立傾聽諭之曰卿勿疑慮朕自有主持大學士劉鴻訓等復請賜崇煥尚方劍假之便宜帝悉從之崇煥又以前此熊廷弼孫承宗皆為人所排搆不得竟其志乃上言恢復之

許不外臣昔年以遼人守遼土以遼土養遼人守為
正著戰為奇著和為旁著之說法在漸不在驟在實
不在虛此臣與諸臣所能為至用人之人與為人用
之人皆至尊司其綸何以任而勿貳信而勿疑蓋馭
邊臣與廷臣異軍中可驚可疑者殊多但當論成敗
之大局不必摘一言一行之微瑕事任既重為怨實
多諸有利于封疆者皆不利于此身者也是以為邊
臣甚難臣非過慮但中有所危不得不告帝優詔答
之

質實

許譽卿字公實
松江華亭人

五月李國楷罷

國楷與魏忠賢同鄉然每持正論劾志選梁夢環劾
張國紀以城中宮類國楷調護之國紀得免罪王化
貞之棄廣寧列城皆走惟巡按御史方震孺保前屯
無動而忠賢素銜震孺嗾其黨誣劾之坐賊擬絞尋

揚州知府劉繹呪詛之獄起又誣震孺與交通坐大辟繫獄國措力為保全帝初即位以登極恩進左柱國少師兼太子太師吏部尚書中極殿大學士國子監生胡煥猷以劾國措等褫衣冠國措薦復之時人稱為長者至是乞歸薦韓煥孫承宗自代卒於家贈太保諡文敏

毀三朝要典

魏忠賢既誅其黨楊維垣等護持舊局上疏力詆東林與崔魏並指為邪黨編修倪元璐再疏攻駁柄國者兩解之元璐尋上言請毀三朝要典畧曰挺擊紅丸移宮三議開於清流而三朝要典一書成於逆豎其議可兼行其書必當速毀蓋當時起事興議盈廷互訟主挺擊者力護東宮爭挺擊者計安神祖主紅丸者伏羲之言爭紅丸者原情之論主移宮者弭變於機先爭移宮者持平於事後數者各有其是不可

偏非總在逆璫未用之先雖甚水火不害損麓此一
局也既而楊漣二十四罪之疏發魏廣微此輩門戶
之說與於是逆璫殺人則借三案羣小求富貴則借
三案經此二借而三案面目全非矣故凡推諉歸孝
于先皇正其頌德稱功於義父此又一局也網自密
而猶疑有遺鱗勢已成而或憂其翻局崔魏諸奸始
創立私編標題要典以之批根今日則衆正之黨碑
以之免死他年即上公之鐵券又一局也由此觀之
三案者天下之公議要典者魏氏之私書三案自三
案要典自要典今為金石不刊之論者誠未深思臣
謂翻即紛囂改亦多事唯有毀之而已夫以閱豎之
權而役史臣之筆亘古未聞當毀一未易代而有
編年不直書而加論斷若曰彷彿明倫規模大典則
是魏忠賢欲與肅皇帝爭聖崔呈秀可與張學敬比
賢悖逆非倫當毀二璫誣先帝偽撰宸篇既不可比
司馬光資治通鑑之書亦不得援宋神宗手製序文

之例假竊誣妄當毀三况史局將開館抄具備七載
非難稽之世實錄有本等之書何事留此駢枝供人
唾詈當毀四疏上帝從之遂焚其板侍講孫
之解忠賢黨也聞之詣閣大哭天下笑之
質實倪

璐字玉汝上虞人

孫之解淄川人

六月來宗道楊景辰罷

宗道代李國楷為首輔事多詭隨編修倪元璐屢言
時事宗道笑曰渠何事多言詞林故事止香茗耳時
謂宗道為清客宰相景辰先與宗道為要典副總裁
一徇奸黨指及朝局已變乃請毀要典言官交章劾
之遂與宗
道同罷

秋七月浙江海溢

是月壬午抗嘉紹三府海嘯壞民居
數萬間溺數萬人海寧蕭山尤甚

海寇鄭芝龍降

芝龍少與弟芝虎從海盜顏振泉為寇振泉死泉盜
無所統約共禱於神祖劍米斛中逃拜之劍動者推
為長芝龍預藏磁石袖間甫拱手劍躍出遂雄長海
上以已衆人不寇衆令其黨劉香寇之泉州官吏招
芝龍降芝龍來受命芝虎不從噪而去猖獗如故然
芝龍嘗敗官軍不追獲將士釋不殺當事知芝龍終
可撫復遣使諭之竟偕芝虎降而其黨李魁奇鍾斌
旋叛去與香仍為盜熊文燦巡撫福建善遇芝龍頗
得其力魁奇屢抗官軍守隘莫兆燦戰歿芝龍擊擒
之又敗斌於泉州斌投海死香連犯閩廣沿海邑廣
州都司許當辰勦香歿於陣文燦議招撫賊伴許之
文燦遽遣叅政洪雲蒸等入賊舟宣諭被執文燦懼

委罪雲蒸古官劫之帝敕文燦戴罪自効乃令芝龍
以遊擊為先鋒合廣東兵擊香海上大敗之香背雲
蒸止兵雲蒸大呼曰賊窮矣急擊勿失遂遇害香自
焚其舟以死○按明史施邦曜傳盜劉香李魁奇橫
海上邦曜繫香毋誘之香就擒魁奇授鄭芝龍事請
撫邦曜言於巡撫鄒維璉討平之與熊文燦傳所載
互殊蓋傳鄭芝龍泉州南安人熊文燦貴州永
聞異辭也質實寧衛人莫兆璠同安人許當辰餘杭
人洪雲蒸長沙人本朝乾隆四十
一年追諡兆璠雲蒸烈愍當辰節愍

革廣寧及薊鎮塞外諸部歲賞

故事廣寧塞外兆哈諾穆圖固英及薊鎮喀爾沁三
十六家歲授撫賞至是盡革去之會歲饑諸部請粟
復不許遂歸誠于我

大清

寧遠兵變

調兵而兵孽索餉而餉絀明至崇禎之世國計迨不可問然當時潢池未甚蕩延荒札未聞遍及何至歲入輒告不充蓋由諸司浮冒居多侵漁無忌即轉餽饋邊亦半蝕于墨吏債帥之手又復上下蒙庇稽核不嚴以致持籌者時行支

四川湖廣兵戍寧遠者以缺餉四月大掠餘十三營起應之時巡撫畢自庸總兵官朱梅通判張世榮推官燕涵淳于無接上兵備副使郭廣初至括二萬金以散不厭貨商民足五萬乃解自庸疏引罪走中左所自經死袁崇煥以八月初抵閩閩變馳與廣密謀宥首惡張正朝張思順令捕十五人戮之市斬知謀中軍吳國琦責參將彭簪古無都司左良玉等四人發正朝思順前鋒立功世榮涵淳以貪虐致變亦斥之獨都司程大崇一營不從變特為獎勵一方乃靖先是聞外止設總兵官一人崔呈秀欲用其私黨增設三四人故推勢相衙督指不運尋定設二人而掣肘如故朱梅將解任崇煥請合寧錦為一鎮仍以總兵官祖大奇駐錦州加中軍副將何可綱都督僉事代梅駐寧遠而移薊鎮趙率教于閩門閩內外止設

絀耳畢自嚴目
擊時艱當慎出
入以釐盡耗乃
襲孔桑故智思
義田增課搜括
紛紜國未足而
民先病其後梁
廷棟復效為敵
加三釐之議科
斂誅求脂膏已
竭而股削更深
致愁怨無聊者
多靡然從盜推
厥禍首非自嚴
而誰

二大將因極稱三人才謂臣自期五年專藉此三人
當與臣相終始屆期不效臣手戮三人而身歸死于
司敗帝可之榮煥遂留鎮宇遠又請罷寧遠及登萊
巡撫不設帝亦報可時度支大絀錦州薊鎮兵相繼
譁戶部尚書畢自嚴言一歲之出浮于所入一百一
十三萬有奇而內供召買不與焉帝命廷臣各陳所
見自嚴擇其可者列上增鹽引議鼓鑄括雜稅蠲
隱田稅寸產諸事皆瑣屑權宜之計民以重困
實 畢自嚴自嚴皆淄川人自嚴字景曾左良玉
字崑山臨清人祖大壽何可綱皆遼東人

九月京師地震

冬十月大學士劉鴻訓免尋遣戍

先是忠賢雖敗其黨猶滿朝言路新進者率抨擊之諸
執政嘗與忠賢共事不敢顯為別白鴻訓至間殺然主

持斤楊維垣李恒茂楊所修田景新孫之猷阮大猷徐
紹吉張納李蕃賈繼春霍維華等人情大快而御史袁
鴻勛史鑑高捷本由維垣輩進思合謀攻去鴻訓則黨
人可安也鴻勛乃言所修繼春維垣夾攻袁衷之奸有
功無罪而誅鉅自三臣始又詆鴻訓使朝鮮清載紹參
而歸錦衣食事張道溶亦訐攻鴻訓鴻訓奏辨給事中
顏繼祖言鴻訓朝鮮之役舟敗僅以身免乞諭鴻訓入
直共籌安攘之策至鴻勛之借題傾人道德之出位亂
政非重創未有已也帝是之給事中鄧英乃盡發鴻勛
賊私且言鴻勛以千金贄維垣得御史帝怒落鴻勛職
侯勛已而高捷上疏言鴻訓斥擊奸之維垣所修繼春
大城而不納孫之猷流涕忠言諍主焚毀要典以便私
黨孫慎行進用帝責以妄言停其俸史鑑復佐捷攻之
言路多不宜兩人兩人遂罷去時帝數召見廷臣鴻訓
應對獨敏詞民困由史失職請帝久任責成以尚書單
自嚴苦治賦王在晉善治兵請帝加倚信帝初甚向之

閩內兵以缺餉鼓譟帝意責戶部而鴻訓詣發帑三十萬示不測恩由是失帝指未幾而有改教書之事舊例督京營者不轄巡軍惠安伯張慶臻總督京營教內有兼轄捕營語提督鄭其心以侵職論之命覈中書行賄改之故下舍人田嘉璧獄給事中李覺斯言藁具兵部送輔臣裁定乃令中書繕寫訖復審視進呈兵部及輔臣皆當問帝心疑其事乃御便殿問諸閣臣皆謝不知帝怒給事中張鼎延御史王道直咸言慶臻行賄有跡不知誰主使御史兵玉言主使者鴻訓也慶臻曰改教乃中書事臣實不預知且增轄捕卒取利幾何乃行重賄帝叱之問兵部揭有鴻訓批西司房語嘉璧亦誣伏受鴻訓指事遂不可解而侍郎張鳳翔詆之尤力閣臣李標錢龍錫言鴻訓不宜有此請更察訪帝曰事已大署何更訪為促令擬旨標等遂迎未上禮部尚書何如寵為鴻訓力辯帝意卒不可回乃擬旨鴻訓慶臻竝革職候勘無何

御史田時震劾鴻訓用田仰巡撫四川納賄二十金
給事中閻可陞劾副都御史賈毓祥由賂鴻訓擢用
鴻訓數被劾連章力辯因言都中神奸狄姓者詭誕
慶臻千金致臣無辜受禍帝不聽下廷臣議罪明年
正月吏部尚書王永光等言鴻訓慶臻罪無可辭而
律有議貴條請寬貸兵部尚書王在晉職方郎中苗
思順賊証未確難懸坐帝不許鴻訓謫戍代州在晉
思順竝削籍慶臻以世臣停祿三年覺斯鼎延道直
王時震以直言增秩一級鴻訓居政府銳意任事帝
有所不可退而曰主上畢竟是冲主帝聞深銜之欲
寘之死賴諸大臣力救乃得稍寬

貨實

劉鴻訓使朝鮮按鴻訓傳

神光二宗相繼崩鴻訓方官編修充使頒詔朝鮮甫
入境遼陽失守朝鮮為遣二洋船從海道還沿途收
難民船重而壞跳淺入小舟飄泊三日夜僅達登州
報命徐紹吉四川保寧人袁鴻勛慈谿人史堃清苑

人高捷寧晉人張道濬沁水人巡按遼東御史銓之
子顏繼祖龍溪人鄧英安福人王在晉字明初太倉
人張慶臻惠安伯偉曾孫李覺斯東莞人張鼎延河
南永寧人王道直漢川人吳玉壽陽人張鳳翔堂邑
人何如寵字康侯桐城人田時震富平人田仰廬陵
人閻可陞韓城人賈毓祥平度人苗時順寧陵人

發明

劉鴻訓力斥閹黨為諸黨人所嫉袁鴻勛等
思合謀攻去之以安其黨莊烈既已知其曲

直為之罪鴻勛罷史莖高捷矣乃未幾而以改教
之事懸生鴻訓加之遣戍夫數書之改寫閹臣固
不得諉以不知然毫無佐證遽憑訛訐之言定為
主使斷以行賄在鴻訓退有冲主之言豈得云無
咎而莊烈以此深銜必欲置之死地且未久而袁
鴻勛等皆仍以言官倚任不幾于代黨人為報復
耶鴻訓之才雖非卓犖其銳意任事亦有足取當
國事艱難之際人材既不易得而又舉措聽榮何

恒十七年中閣臣
至五十人之多哉

十一月召對廷臣于文華殿禮部侍郎錢謙益以罪削
職都給事中章允儒等降謫有差

詔會推閣臣廷臣列吏部侍郎成基命及謙益等名
以上時同推者鄭以偉李騰芳孫慎行何如寵薛三
省盛以宏羅喻義王永光曹于汴凡十一人禮部尚
書溫體仁侍郎周延儒以無素望不與延儒性警敏
善同意指方錦州兵譁袁崇煥請給餉帝召問諸大
臣皆請發內帑延儒獨進曰關門昔防敵今且防兵
寧遠譁餉之錦州譁復餉之各邊效尤帑將安給帝
曰卿謂如何延儒曰事迫不得不發但當求經久之
策帝悅曰卿言是也降旨責羣臣越數日復召問延
儒曰餉莫如粟山海積粟不缺也缺銀耳何故譁安

錢謙益闕節一事真偽雖不可

知非騎弁構煽以脅崇煥邪帝方疑邊將要挾聞延
儒言復悅曰卿言是由此屬意延儒而會推帝及體
仁揣帝意必疑遂上疏訐謙益為考官時闕節受賄
不當與聞臣選先是謙益典試浙江有奸人金保元
徐時敏偽作闕節用俚俗詩一朝平步上青天句分
置七義結尾校舉子錢千秋遂中式千秋本能文同
考官薦擬第二謙益改置第四千秋知為保元時敏
所賣與之聞事傳京師為給事中顧其仁所發謙益
大駭即具疏劾二奸及千秋俱下吏論成謙益亦奪
俸二奸尋斃千秋遇赦釋還事已七年矣至是體仁
復理其事帝果心動次日召對閣部糾道諸臣于文
華殿命體仁謙益皆至謙益不虞體仁之劾已也辭
頗屈而體仁盛氣詆謙益言如泉湧因進曰臣職非
言官不可言會推不與宜避嫌不言但枚卜大典宗
社安危所係謙益結黨受賄舉朝無一人言者臣不
忍見陛下孤立于是以不得不言帝久疑廷臣植

知然前此草率
具獄時溫體仁
已官禮部何不
聞特疏糾陳乃
因不與廷推輒
假公直之名潛
行傾軋章允儒
斥其熱中缺望
實洞見癥結之
言體仁顧以謙
益皆皆聞曹為
解尤為理窮辭
遁殊不思科目
重闢名器夤緣
干進犯即宜懲
設如所言則謙

黨聞體仁言輒稱善而執政皆言謙益無罪吏部都
給事中章允儒爭尤力且言體仁熱中朕望如謙益
當糾何俟今日體仁曰前此謙益皆閉曹今者糾之
正為朝廷慎用人耳如允儒言乃真黨也允儒曰黨
之說小人以陷君子天啟朝可鑒帝怒命禮部逮十
秋奏責謙益謙益引罪帝歎曰朕幾誤遂叱允儒下
詔獄并切責諸大臣時大臣無助體仁者獨廷儒奏
曰會推名雖公主持者止一二人餘皆不敢言即言
徒取禍耳且千秋自有成案不必復問諸臣帝乃即
日罷謙益官命議罪坐杖論贖允儒及給事中瞿式
耜御史房可壯等皆坐謙益黨質實錢謙益字受之
降謫有差千秋復被逮荷校死常熟人章允儒
南昌人成基命字靖之太名人鄭以律字子器上饒
人薛三省字魯叔定海人羅喻義字湘中益陽人溫
體仁字長卿烏程人周廷儒字玉繩宜興人顧其仁華陽人房可壯益都人

益或不與枚卜
竟可不加窮治
而末僚散秩皆
可聽其公行舞
弊乎如此閃爍
支離莊烈尚深
信而亟賞之甚
矣其蔽也

十二月韓爌復入閣

帝登極後言者爭請召爌為逆黨楊維垣所扼但賜
教存問是年五月始遣行人召之及是還朝會帝以
錢謙益事悉置廷推者不用遂命爌復為首輔帝御
文華後殿閱章奏召爌等諭以擬旨務消異同開誠
和衷期於至當爌等頓首謝退言所諭甚善而密勿
政機諸臣參互擬議不必顯言分合至臣等晨夕入
直勢不能報謝賓客商政事者宜相見於朝房而一
切禁私邸交際帝即諭百察遵行劉鴻訓方被重譴
爌至即具疏申救不聽會御史毛九華劾溫體仁居
家時以抑買商人未為商人所訴賂崔呈秀以免又
因杭州建逆祠作詩頌魏忠賢帝下浙江巡撫嚴實
未報御史仕贊化復劾體仁娶昌受金奪人產諸不
法事體仁揣已為清議所斥因力求去以要帝且言
臣以訐罷錢謙益故其黨排訐臣者百出而無一人

左袒臣臣孤立可見帝再召內閣九卿質之體仁與
九華贊化詰辨良久言二人皆謀逆死黨帝心以為
然未燭召廣等於內殿謂進言者不憂國而植黨自
名來林於國事何補當重經以法廣請寬言官以安
體仁既退具揚言人臣不可以黨事若人君亦不可
以黨疑臣但當論其才品咸否職業修廢而無涉之
若戈矛妄起於朝堂吟域橫
質實 毛九華振縣人
分於官府非國之福也不納
任贊化聞喜人

陝西饑流賊大起

先是閩黨喬應甲巡撫陝西朱童蒙巡撫延綏皆貪
黷虐民氏民多起為盜有劫官吏署者應甲置盜不問
反脅官吏責重賄盜乃日橫而被盜者莫敢告至是
連歲大祲有司不恤下白水王二者鳩眾墨其面突
入澄城散知縣張耀來由是府谷賊王嘉允宜川賊
王左掛等一時並起遂攻城堡殺官吏安塞賊高迎

祥與飢民王大梁復聚應之迎祥自稱閩王大梁自
稱大梁王尋因原兵以無餉諱亦叛去為盜大吏悉
聞賊曰此飢民也徐自定耳明年帝從給事中劉懋
議裁驛站冗卒山陝游民仰驛糈者無所得食皆從
賊
質實 白水漢果邑晉廢後魏復置白水縣澄城後
魏置明並屬同州以隸于西安府今升同州
為府二縣仍屬馬府谷五代後唐置明屬葭州以隸
于延安府今屬榆林府宜川西魏義川米改宜川安
塞宋置元升縣明並屬延
安府今因之劉懋臨潼人

發明

變新不沃而火燎于原門務不除而蔓延于
野方朱室家喬應甲之時什竊奸究漸起獲

捕捕而俘之一長吏力也火此不治馴至宜川白
水嘯聚為羣然弄兵演池烏合之眾耳陝西分
建五鎮宿將勁兵雄于天下使乘竄發之初原禁
官軍寇期進勦得厥渠魁剪其枝黨不數日聞定

矣而乃藉口飢氓曲為盜肆遂使疥癬之疾釀毒成癰狐鼠之伎假威作虎擄竿響應蹂躪中原而國隨以亡滅是

果誰之咎哉

己巳二年春正月周道登罷

道登嘗召對帝問宰相須用讀書人何解對曰容臣至閣中檢閱曰奏帝有溫色又問章奏內有情面二字何之對曰情面者面情之謂左右皆匿笑道登前在禮部頗有所爭執及柄政後排正人庇私交屢為言路所劾帝悉下其章廷議尚書王永光等言所劾俱有實跡遂放歸

定逆案

詔定魏忠賢逆案問臣韓爌等不欲廣搜樹怨僅以四五十人上帝少之令再議又以數十人上帝不憚

韓爌等受詔審定援書自當持

正詳嚴俾奸徒不至漏網乃始則托言不知內侍繼復以法非所習為詞而王承光亦以不諳刑名自諉曾不計逆黨之朋謀害政實國法所難寬顧以廣搜樹怨為虞而甘為之容私曲徇其心豈可復問至喬允升等所定之案雖若羅列無遺然其擬

令以贊導擁戴頌美詔附為目曰忠賢一內豎耳苟非外廷助虐何遽至此且內廷同惡者亦當入爐等以不知內侍為對帝曰豈皆不知特畏任怨耳問日召入便殿案有布囊盛章奏甚夥指之曰此皆奸党頌疏可案名悉入爐等知帝意不可回乃曰臣等職在調旨三尺法非所習帝召吏部尚書王承光問之以不習刑名為對乃召刑部尚書喬允升左都御史曹于汴同審定案所羅列幾無脫遺至是上之帝親加裁定自魏忠賢客氏依謀反大逆律磔死外以六等定罪曰首逆同謀在呈秀及魏良卿侯國興太監李永貞李朝欽劉若愚六人俱立斬曰交結近侍劉志選梁夢環倪文煥田吉劉詒薛貞吳淳夫李夔龍曹欽程許志吉孫如河陸萬齡李永祚田爾耕庄應元楊家孫雲鶴許顯純張體乾十九人俱斬秋後處決曰交結近侍次等魏廣微周應秋閻鳴鳳霍維華徐大化潘汝楨李魯生楊維垣張鈞郭欽孝之才

服上刑者類皆已經正辟之人而擁戴僅止荷戈諂附亦繫從城且所坐失倫究不免于陰行庇護以懲奸重事而諸臣瞻顧遲迴竟不克持明允以昭炯戒明李朝臣積習頹壞于此可見安得不淪于亡

壯烈承天啟廢地之後力為整

十一人及逆孽魏志德等十三人人俱充軍曰請附擁戴太監李實等十五人亦俱充軍曰交結近侍又次等頗東謙馮鈺張瑞圖來宗道王紹徽等一百二十人俱坐徒三年贖為民曰交結近侍或等或立枉等四十四人俱革職閒住又于諸人姓名下各注所犯刊布中外知之方案初定張瑞圖來宗道及賈繼春皆不與帝名見閔臣及允升于汴于平臺詰之閔臣等以瑞圖宗道無實狀對曰瑞圖善書為忠賢所受宗道為崔呈秀父請卹典中有在天之靈語非實狀耶又問繼春對曰維春雖反覆然持論亦有可取帝曰唯反覆故為小人三人遂俱論徒

三月以楊鶴總督三邊軍務捕流賊

鶴初官僉都御史忤忠賢罷去帝即位復官進左副都御史鶴見帝求治太急乃上言圖治之要在培元

頗尚有志于明
作有為但其燭
理不明加以多
疑偏執往往以
瑣屑處委曲推
尋小過或偶見
搜求巨惡轉任
其滕蔽所以賢
奸雜進刑賞乖
方暮改朝更迄
無定見其受病
不在精察之有
餘而在英斷之
不足楊鶴乃托
培養元氣為名
轉以事事勵精

氣自大兵大疫加派頻仍小民之元氣傷遼左黔蜀
喪師失律封疆之元氣傷縉紳構黨彼此相傾逆閹
乘之誅鋤善類士大夫之元氣傷譬如重病初起百
脉未調風邪易入急當培養而陛下事事勵精臨軒而
贊或問之而未必盡知事下六曹或呼之而未必立
應致干聖怒數取譴訶竊以為過矣今一切
民生國計吏治邊防宜取祖宗成法委任責成嚴為
之程寬為之地圖之以漸鎮之以靜何慮不臻太平
哉疏入報聞尋三邊總督武之望卒官而是時閹中
寇熾廷臣莫肯往羣推鶴帝召鶴問方畧對曰清慎
自持撫恤將卒而已遂拜鶴兵部右侍郎代之望總
督軍務討賊先是流寇王大梁由畧陽逼漢中餘賊
望洛川淳化三水等十餘州縣遊擊高從龍戰沒固
原逃兵周大旺等復掠涇陽富平勢甚張及鶴至叅
政劉應遇已先擊斬王二子于白水追熾大梁于漢
南副將賀虎臣亦捕斬大旺等賊渠畧盡而繼起者

為太過實為謬
妄是不過懼大
權在上不能逞
所欲為遂不顧
其詞之害理果
如所請依成法
而委任責成則
必至高拱無為
而後已視神熹
覆轍又何以異
乎

益泉延安榆林間所在皆賊鶴素有清望然不知兵
廟堂遂用之竟莫能勦賊後遂一意主撫以致敗

質實

淳化宋以雲陽縣之黎國鎮置明屬邠州以隸
于西安府三水漢縣元廢明正統中復置亦屬

邠州以隸于西安府

本朝雍正三年升邠州為直

隸州二縣仍屬焉楊鶴字修齡武陵人武之望臨潼

人賀虎臣

保定人

夏五月乙酉朔日有食之

先是大統歷推食三分二十四秒回回歷推食五分
五十二秒禮部侍郎徐光啟依西法預推順天府食
二分有奇應天食六分有奇瓊州食既大寧以非不
食至是光啟法驗大統回回歷皆疎帝切責監官于
是五官正戈豐年等言大統乃洪武時所定寔即郭
守敬授時歷也自至元十年造歷越十八年為大德

三年八月已當食不食六年六月又食而失推是時
守敬方知院事不能無乖錯況斤斤守法之者哉今
若循循向後不能無差光啟亦言歲差環轉歲實參
差天有緯度地有經度列宿有本行月五星有本輪
月有真會視會皆古所未聞惟西法有之宜取以參
互考訂與大統法會同歸一尋上厯法修正十事因
薦太僕少卿李之藻西洋人龍華民鄧玉函善推步
報可遂開厯局以光啟為監督未幾華民卒更徵西
洋人湯若望羅雅谷譯書演算光啟加本部尚書仍
督修厯法西法之行自此始初西法與回回厯相同
周天三百六十度度六十分分六十秒一日十二時
時八刻刻十五分有閏日無閏月迨入中國又通融
中法始復置閏月窮推詳測益**質實**大統厯吳元年
加精密而授時大統之說漸絀十一月乙未冬至
太史院使劉基率其屬高翼上戊申大統厯洪武
十七年漏刻博士元統以大統積分猶踵授時之數

非所以重始敬正乃摺為監正取授時法去其歲實消長之說析其條例得四卷以洪武十七年甲子為歷元命曰大統歷法通軌二十六年監司李德芳言當復用消長之法自是大統歷元以洪武甲子而推算仍依授時法云回回歷出西域元置回回司天臺與授時法並行明洪武三年設科肆欽天監亦參用之歷法修正十事其一議歲差每歲東行漸短漸長之數以正古來百年五十年六十年多寡互異之說其二議歲實小餘昔多今少漸次改易及日景長短歲歲不同之因以定冬至以正氣朔其三每日測驗日行經度以定盈縮加減真率東西南北高下之差以步日躔其四夜測月行經緯度數以定交轉遲疾真率東西南北高下之差以步月離其五密測列宿經緯行度以定七政盈縮遲疾順逆違離遠近之數其六密測五星經緯行度以定小輪行度遲疾苗逆伏見之數東西南北高下之差以推步凌犯其七

推莫黃道赤道廣狹廣數密測二道距度及月五星
各道與黃道相距之度以定交轉其八議日月去交
遠近及其會視會之因以定距午時差之真率以正
交食具九測日行考知二極出入地度數以定周天
緯度以齊七政因月食考知東西相距地輪經度以
定交食時刻其十依唐元法隨地測驗二極出入地
度數地輪經緯以求晝夜晨昏永短以正交食有無
先後多寡之數西法明神宗萬厯中有大西洋人利
瑪竇者進貢土物與其國人龐迪義熊三拔及龍華
民鄧玉函湯若望等先後至俱精究天文攜有彼國
厯書多中國厯籍所未備者于時徐光啓李之
藻皆宗之是為西法徐光啓字子先上海人

六月袁宗煥殺總兵官毛文龍于雙島

文龍鎮東江歲糜餉無算所往輒敗劾詭稱捷冒功
又縱下恣淫掠騷擾不樂受節制宗煥始受事即欲

誅文龍大學士錢龍錫以崇煥名對時有五年復遼語因遣寓詢方畧崇煥曰恢復當自東江始文龍可用則用之不可用則處之易易耳比崇煥莅鎮疏請遣部臣理東江餉文龍惡文龍臣監制抗疏駁之崇煥不悅尋文龍來謁接以賓禮文龍不讓崇煥謀益決至是以閱兵為名泛海抵雙島文龍來會崇煥與相燕飲每至夜分文龍不覺也崇煥局更營制設監司文龍拂然崇煥以歸御動之文龍曰向有此意但惟我知東事東事畢朝解衣弱可襲而有也崇煥滋不懌遂以六月五日遜文龍觀將士射先設幄山上令參將謝尚政等伏甲士幄外文龍至步卒不得入崇煥曰予詰朝行公當海外重寄受予一拜定拜畢登山因詰文龍違令數事文龍抗辯崇煥厲聲叱之命去冠帶繫縛文龍猶倔強崇煥曰爾有十二斬罪知之乎祖制大將在外必命文臣監爾專制一方軍馬錢糧不受扶一當斬人臣之罪莫大欺君爾奏報盡

袁文煥雖稍有
才畧而粗率自
用前此平臺名

敗妄殺瀕海難民冒功二當斬人臣無將將則必誅
爾奏稱收馬登州取南京如反掌天逆不道三當斬
每歲餉銀數十萬不以給兵月止散米三斗有半侵
盜軍糧四當斬擅開馬市于皮島私通海外諸國五
當斬部將數千人悉冒己姓副將以下濫給副付千
走卒與夫盡金緋六當斬自寧遠剽掠商船自為盜
賊七當斬強娶民間子女不知紀極部下效尤人不
安室八當驅難民遠竊人參不從則幽之島上僵餓
死者白曾如莽九當斬犖金京師拜魏忠賢為父望
冕旒像于島中十當斬鐵山之敗喪軍無算掩敗為
功十一當斬開鎮八年擁兵觀望不能恢復寸土十
二當斬數罪文龍不能置辯但叩頭乞免崇煥台
諭其從官曰文龍罪狀當斬否皆惶怖唯唯中有稱
文龍數勞苦者崇煥叱退之乃頓首請旨出賜尚方
寶劍斬文龍于帳前然後出諭其部卒曰誅止文龍
餘無罪皆不敢動分其兵為四協以文龍子承祚及

對己為大言不
慚至毛文龍雖
慄悍不馴初未
顯然跋扈崇煥
即欲加裁制要
自有控馭之方
縱罪在當誅亦
應請命于上乃
以禮節微嫌輒
行誘殺其專擅
之罪較張浚之
殺曲端為更甚
莊烈玩心駭其
事非但不加責
備轉用優旨報
聞實乖馭將之

司將陳繼盛等領之犒軍士檄撫諸島盡除文龍虐
政還鎮以其狀上聞未言文龍大將非臣得擅誅謹
席葉待罪帝驟聞意殊駭既念文龍已死方任崇煥
乃優旨褒答崇煥又上言文龍一匹夫不法至此以
海易為亂也其衆合老稚四萬七千妄稱十萬且民
多兵不能二萬妄設將領千今不且更置帥即以副
將繼盛攝之于計便又慮部下為變請增餉銀至十
八萬帝皆報可時文龍專閩海外有跋扈聲崇煥一
旦除之自謂可弭後患然東江屹然巨鎮文龍元
日衰弱且島弁失主附心漸攜二不可用其後致有
叛去
質實 島中在今奉天府寧海縣
西向海中陳維盛遼東人

秋八月總督雲貴川湖廣西軍務朱爰元平水西蠻

先是爰元督五路師討永寧奢崇明及水西安邦彥
以計賂賊黨殺崇明子寅寅死元崇明年老無能為

體即因邊事委任方切亦何至廢法濫恩若此且崇煥于東江重鎮不復議置帥臣致島衆益孤劉興治遂據以滋亂而慮部下為變即請增給餉銀雖後此魏呈濶論奏終不能除虛糜之弊崇煥之措置乖方大畧可知莊烈悉為報可而不復加籌度

邦彥勢孤因乞撫燮元聞于朝許之乃遣參將楊明暉往撫燮元旋以父喪歸偏沅巡撫閔夢得來代夢得策用兵當自永寧始疏陳方畧未報尋召還代以尚書張鶴鳴議遂寢鶴鳴未至明輝奉制書催招撫邦彥兄子位不云赦邦彥邦彥怒殺明輝撫議由此絕鶴鳴祝師年餘未嘗一戰賊得養其銳崇禎元年六月復起燮元故官兼巡撫貴州遂用夢得前議檄雲南兵下烏撒四川兵出永寧下畢節而親率大軍駐陸廣逼大方總兵官許成名奏改鄭朝棟由永寧復赤水時邦彥自稱四裔大長老號崇明大梁王勢張甚聞官軍四路並進乃分其部衆據守陸廣鴨池三岔諸要害別以一軍取遵義自以兵十餘萬先犯赤水燮元投計成名令誘賊至永寧而潛遣總兵官林兆昂從三岔入副將王國禎從廣陸入劉義鯤從遵義入合傾其衆邦彥與成名戰于赤水成名佯北邦彥悉力進會四川總兵侯良柱副使劉可訓方士

其優柔自悞更
可概見矣

永寧與賊遇遂接戰小却成名遂師來援賊乃據五
峯山桃花壩官軍仰攻不得上越數日良柱傾賊不
備與副將鄧圮等侵早霧迫之成名聞山上呼噪聲
亦出助戰賊奔鵠頸嶺徑長而恒人馬不能容良柱
圮乘勝逐之賊復敗尋又敗之紅土川死者數萬人
邦彥崇明皆拔首捷聞帝大喜以成名與良柱爭功
賞久不行而烏撒土司安效良者邦彥黨也效良前
為滇撫閔洪學所破既敗死其妻招故霑益土酋安
遠弟邇為夫負因不服變元乘兵威脅走邇遂復烏
撒變元以境內賊畧盡不欲窮兵乃檄招安位位不
決變元集將吏議曰水西北險多箐篁蠻烟焚而莫
辨晝夜深入難出今當扼其要害四面迭攻賊乏食
將自斃于是攻之百餘日斬級萬餘義親復遣人入
大方燒其室廬位大恐明年春遣使乞降變元許之
積年巨寇皆平方宗明邦彥之投首也川中諸將功
為多而黔將爭之變元頗右黔將屢奏于朝為四川

巡按御史馬如蛟所劾變元力求罷帝慰留之變元以巨寇雖平而雲貴諸苗猶出沒為患檄副使朱家名與成名等討平定番鎮寧諸苗乃通威清等上六衛及平越清平偏橋鎮遠四衛道路凡千六百餘里繕亭障設游徼勒平洪邊土官朵嗣殷就其地置開州復置故施秉縣招流民實之尋又撫定阿迷土司普名聲之亂苗患乃漸息初官軍討邦彥久無功御史毛羽健言賊巢在大方黔其前門蜀遵永其後戶由黔進兵必渡陸廣奇險七晝夜可抵大方一夫當關千人自廢此官軍所以屢敗也遵義拒大方三日程而畢節止百餘里迺平衍從此進兵何患不克因畫上足兵措餉方畧并薦變元可任及是平賊皆如其議

質實

昔名聲之亂名聲者阿迷州土官普維藩子初以從征有功授土知州崇禎趙洪範

按部名聲不出境迎及出戈甲旗幟列數里洪範大怒謀之巡撫王伉請討之官軍進圍州城名聲恐使

人約降而陰以重賄求援于元謀土官吾必奎必奎奉調從征與名聲戰兵始合併敗走官軍望見大潰布政使周士昌副總兵秦拱明通判游大勳戰死僉事王信遊擊范應華同知楊于陞被執皆罵賊死朝廷以起釁罪伉連治而名聲旋亦就撫巡撫偏沅地方贊理軍務一員明萬歷二十七年以征播暫設尋罷天啓二年後或置或罷崇禎二年定設赤水元永寧路地明洪武二十二年始分永寧置衛距四川布政司六百二十里 本朝康熙二十六年省入畢節縣鴨池河在清鎮縣西北一百里與水西為界五峯山桃花壩鵝頸廟並在四川叙州廳東南與貴州畢節縣為界紅土川在畢節縣廢赤水衛西鎮寧漢唐宋為牂牁羅甸地元始置鎮寧州明洪武十四年屬普定府尋改屬四川普定衛正統三年改屬貴州布政司嘉靖十二年遷州治于安莊衛城萬歷三十年改屬安順府今因之咸清上六衛蓋咸清安莊平

壩安南畢節赤水六衛也明洪武中以元貴州宣慰司及普安永寧鎮寧地置本朝康熙十一年改安

莊衛為鎮寧州治二十六年改威清衛為清鎮縣治

平壩衛為安平縣治畢節衛為畢節縣治安南衛為

安南縣治省赤水衛入畢節縣平越清平偏橋鎮遠

四衛明洪武十四年以元平月長官司地置平越衛

本朝康熙十一年改縣為平越府治明洪武十四

年以元麻峽縣地置清平堡尋改衛弘治八年于衛

城增署清平縣本朝康熙七年省縣入麻哈州十

一年復置縣以衛省入屬都勻府偏橋注見前鎮遠

廢衛在鎮遠府城西南濛水西岸五老山之麓明洪武

二十二年置湖廣鎮遠衛指揮使司本朝康熙二

十二年割屬貴州尋併入鎮遠縣施秉元為施秉前

江等處蠻夷軍民長官司明洪武五年改為施秉蠻

夷長官司正統九年改縣天啓元年省崇禎四年復

置屬鎮遠府阿迷漢益州地元初為阿甯萬戶府阿

寧古蠻名後譚為阿迷明洪武十五年改置阿迷州
屬雲南臨安府今皆因之閔夢得烏程人林北昂福
建人侯良柱字朝石永寧衛人劉可訓澧州人鄧玘
四川人閔洪學烏程人馬如蛟字騰仲和州人朱家
名曲靖人毛羽健公安人趙弘範嘉定縣人秦拱明
忠州人游大勲婺源人王信宜賓人范應華建水州
人楊于陸劍州人本朝乾隆四十一年追謚秦拱
明烈愍周士昌游大勲王信范應華楊于陸節愍
冬十一月我
大清兵下遵化遂薄燕京

我

太宗文皇帝以七大恨未雪乃于是年十月

親統大軍進討次老河分兵三路

命濟爾哈朗等率右四旗及右翼蒙古兵攻大安口阿巴泰

等率左四旗及左翼蒙古兵攻龍井關我
太宗親督大軍以蒙古哈喇沁台吉布爾噶都為鄉導攻洪

山口克之至是抵遵化西翼兵來會距城五里而營
山海關總兵官趙率教聞我

大軍入近畿疾馳三晝夜赴援抵三屯營總兵官朱國
彥不令入率教遂策而西與

大軍遇悲力拒戰中沉矢陣亡一軍盡歿我

大兵四面樹雲梯攻城正白旗小卒薩木哈圖先登

大軍相繼上守陴兵潰參將李楨逃擊彭文炳戰死
撫王元雅及保定推官李獻明永平推官何天球知
縣徐澤前知縣李起潛皆死之

太宗嘉元雅忠命賜棺殮

親酌金卮勞薩木哈圖並予優錄而三屯營及馬蘭鎮亦為

我別將所下副總兵張拱徵戰歿國彥具衣冠西面

稽首偕妻張氏投繯死于是我

大清兵由劉州而西徇三河臨順義城大同總兵官滿

桂宣府總兵官侯世祿各率所部勤王戰于城下俱敗奔京師城遂降進至通州渡河駐營城北我知終不相容告

太宗傳

論略城曰爾國底葉赫而戕害我大恨有七我

天興師

國賜我河東地我

天直我

太祖皇帝猶願和好爾國不從

天天賜我河西地我復屢次願和而爾主頻加欺凌故今日

與師而來順者撫逆者誅天運循還得天者興人豈能為非我恃強逞兵也

諭既

徧薄京城營于城北土城關之東

太宗率諸貝勒及護軍環閱燕京城招男女之逃竄者縱之

入城乃進兵距闕廂二里而營時桂世祿俱走德勝門

大兵至世祿兵潰桂獨進戰協理戎政尚書李邦華督兵守城令城上發大砲佐桂誤傷桂軍桂亦員傷帝

遣中官勞以羊酒令入休甯城旋與廷臣及督師袁崇煥等召見平臺桂解衣示創帝深嘉歎召廷臣方畧侍郎周延儒言本兵倚禦疎忽調度乖張檢討項煜維之且曰世宗斬一丁汝變將士震悚強敵宵遁帝頷之遂下兵部尚書王洽于獄邦華亦以誤傷桂軍為言官劾罷時

大清兵駐郊圻久城中洶洶獄囚劉仲金等百七十人破械出欲踰城被獲帝震怒下刑部尚書喬允升侍郎胡世賞提牢主事教維榮于獄坐允升絞

老

質實

河

以年老減死與維榮俱戍邊世賞贖罪為民

在哈喇沁右翼南一百九十里源出明安山東北流會諸小水經教漢北翁牛特左翼南又經奈曼哈爾哈二部之北流五百里許與潢河合大安口在遵化州西北三十里鮎魚關東龍井關在遷安縣西北一百九十里西接遵化之洪山口陡峙邊外洪山口在遵化州北少東五十里白棗谷東三屯營在遵化川

東六十里馬蘭關在遵化州西北七十里有堡城在
關南十里甕城明嘉靖四十一年添築永定等七門
甕城至四十三年六月城始成趙率教與滿桂為時
良將莊烈帝聞其敗沒賜卹典立祠奉祀 本朝乾
隆四十一年追謚忠烈同時戰歿之千戶蔡國勲入
祠張拱微神木人李櫝大同人彭文炳吉水人王元
雅太原人李獻明字思皇壽光人以察核官庫至遵
化或謂居官保定此邑非所轄去無罪獻明正色曰
莫非王土敢見危避難請守東門城破死何天球增
城人徐澤字允若襄陽人莅任甫七日死武起潛字
用潛進賢人里誤解官候代遂同殉節後孫承宗請
卹死事諸臣乃贈獻明天球光祿少卿澤光祿丞俱
廕一子元雅以大吏失城贈卹不及乾隆四十一年
追謚張拱微李櫝烈愍王元雅李獻明何天球徐澤
武起潛朱國彥彭文炳節愍侯世祿綏德州人項煜
字永心吳縣人王洽臨邑人雅負時望而應變非所

長帝方惡廷臣玩愒故
于洽不少貸未幾瘐死

以成基命為禮部尚書兼東閣大學士預機務召孫承
宗復為兵部尚書兼中極殿大學士視師通州

先是遵化失守帝聞報召見廷臣于平臺基命請召
還故輔承宗任以兵事帝然之乃命基命入關而立
召承宗至入對具陳方畧帝稱善曰卿不須往通州
其為朕總督京城內外守禦事務仍參帷幄趣首輔
韓爌卅救下所司鑄關防承宗出漏下二十刻矣即
周閱都城五鼓而畢復出閱重城明日夜半忽傳旨
仍守通州時鋒火逼近郊承宗從二十七騎出東便
門道亡其三疾馳抵通州門者幾不納既入城與保
我定巡撫解御史方大任總兵楊國棟登陴固守旋聞

大清兵已薄都城乃急遣遊擊尤岱以騎卒三千赴援復遣副將劉國柱督師二千與岱合而發密雲兵三千營東直門保定兵五千營廣寧門以其間仍復遣將復馬蘭三屯二城質實東便門在北隅北向解經傳韓城人方大任桐城人楊國棟山海衛人尤岱榆林人

十二月下督師袁崇煥于獄總兵官祖大壽擁兵奔錦

州

初崇煥建議請和欲藉此緩師修理故疆我

大清方有事朝鮮亦欲假是以阻其兵因得一意東討乃遣使以書相往來已而崇煥聞于朝奉旨戒諭言路亦以為非崇煥復以書詢錢龍錫龍錫亦阻之事

尋止及

大清兵入龍井關諸隘口崇煥聞即督祖大壽何可綱

等率師入衛以十一月十日辛丑抵劉州所遇撫寧
永平遷安豐潤玉田諸城皆留兵以守帝聞其至甚
喜溫旨褒勉發帑金犒將士令盡統諸道援軍俄聞
大清兵下遵化越薊州而西崇煥懼即引兵入護京師
與滿桂同名見慰勞備至諮以戰守策賜御餼以及
貂裘崇煥以士馬疲敝請入休城中不許請屯兵外
城亦不許時

大清兵所入隘口乃薊遼總理劉策所轄而崇煥未奉
勤王詔即千里赴援自謂有功無罪然都人驟遭兵
怨謗紛起謂崇煥擁兵坐視朝士因其和議誣其招
兵脅和將為城下之盟帝頗聞之不能無惑崇煥營
廣渠門外伏兵隘口我
大軍分道夾擊敗之崇煥復移兵城東南隅豎立柵木
我

大軍列陣逼之而營

太宗

文皇帝率諸貝勒輕騎往視曰此殘敗之餘何足勞我

軍遂不戰還先是

大軍獲宦官二人令副將高鴻中等守之因

授密計鴻中等于二宦官前故作耳語云今日撤兵乃
上計頃見敵有二人來見

上語良久乃去意表巡撫有密約事可立就矣時楊太監者
佯卧竊聞其言縱之歸以所聞告于帝帝遂信之不

疑再召見崇煥及大壽于平臺詰崇煥以殺毛文龍
之故責其援兵逗遛縛付詒獄成基命叩頭請慎重
者再帝曰慎重即因循何益基命復叩頭曰兵臨城
下非他時比帝不省大壽在旁股栗懼并誅出即與
何可綱擁衆東走毀山海關出遠近大震大壽先嘗
有罪孫承宗欲殺之愛其才密令崇煥解救故大壽
德崇煥基命知之言于帝就獄中取崇煥手書急遣
都司賈登科齎諭大壽孫承宗亦令遊擊石國柱馳
撫諸軍大壽見登科言麾下卒赴援翼効勞績而城
上罵詈為賊投石擊死數人所遣邏卒指為間諜而

殺之勞而見罪是以奔還柱國追及諸軍其將士持
弓刃相向皆垂涕言督師既下獄又將以大砲擊斃
我軍故至此柱國復前追大壽去已遠乃返承宗奏
言大壽危疑大壽危疑已甚又不肯受滿桂節制因
謗言激衆東奔非部下盡欲叛也當大開生路曲收
衆心遼將多馬世龍舊部曲臣謹用便宜遣世龍馳
諭其將士必解甲歸大壽不足慮也帝喜從之承宗
密札諭大壽急上自列且立功贖督師罪已當代為
剖白大壽諾之具列東奔之故悉如將士言帝優詔
報之命承宗移鎮關門諸將聞承宗世龍至多自拔
來歸者大壽妻左氏亦以大質實撫寧唐始分盧龍
義責其夫大壽乃歛兵待命縣置明屬永平府
今因之豐潤金始分玉田縣置明屬薊州以隸于順
天府今屬化州廣渠外城七門之東門也劉策字範
武定人明年正
月論死棄市

發明

袁崇煥在邊臣中尚有膽畧其率兵勤王實屬有功無罪莊烈始則甚喜其至倚若長城

一聞楊太監之言不審虛實即下崇煥于獄尋至磔死是直不知用間愚敵為兵家作用古今來被絀而債厥事者指不勝屈未有若莊烈如此之甚者至祖大壽擁衆東走追而不返且出怨言甚至將士以弓刃相向此其叛迹顯然向非孫承宗調度有方豈能斂兵待命而轉以優詔報之崇煥非叛而坐以大逆大壽實叛而褒以璽書刑章顛倒國法何存豈惟不知將將之道抑亦大失御下之方矣

武經畧滿桂帥師出戰敗績桂及前總兵官孫祖壽等死之

我

大清兵既圍燕京諸貝勒大臣等咸請進攻

太宗文

皇帝曰攻城固可必得倘堅城之下失我一二良將
雖得百城亦不足喜乃止勿攻屢遣使齎書議和遂
自德勝門移營循海子而南且獵且行趨良鄉克其
城知縣完還醇與教諭安上達訓導李廷表典史史
之棟驛丞楊其禮皆死焉

大兵復分道攻固安亦下之還軍至盧溝橋副總兵申
甫者故僧也好談兵私製戰車火器庶吉士金聲薦
之帝立召見取其車入覽即擢副總兵給賞金募新
軍改聲御史監之甫倉猝募數千人皆市井遊手大
學士成基命閱其軍極言不可用帝不聽甫所需軍
裝戎器又不能時給出城戰輒敗及是結車營于
盧溝橋以拒

大清兵遠出其後御車者皆惶懼不能轉穢戮殆盡甫
亦陣亡遂而永定門時以袁崇煥下獄特設文武兩

經畧以尚書梁廷棟及滿桂為之屯西直安定兩門
帝趨桂出師桂言衆寡勢殊未可輕戰中使趨之急
不得已乃督孫祖壽黑雲龍麻登雲等移營永定門
外二里許列柵以待明日昧爽

大清兵以精騎四面蹙之諸將不能支桂祖壽及叅將
周鎮戰死雲龍登雲被執帝聞震悼遣禮部侍郎徐
光啓致祭贈桂少師世廕錦衣僉事襲陞三級賜祭
墓有司建祠尋追謚毅祖壽亦卹贈如制帝以諸
路兵皆敗憂甚不視朝傳旨辦布囊八百中官競獻馬
騾又令百官進馬順天府戶劉宗周曰是必有遷幸動
上者乃疏言國勢強弱視人心安危乞延見百僚諭以固
守外無他計俯伏待報自晨迄暮得請乃退羣議由此息
質實 孫祖壽字必之昌平人歷官副鎮總兵既罷官家居散家
財招舊部赴援遂歿于陣虎還醇字子貞三原人
大清兵薄城督吏乘城拒守或言縣小無兵盍避去還
醇毅然曰吾守土吏也去將安之救兵不至力屈城

破死事定父老覓還醇屍得之忤問赤身面縛休被
數鎗辱哭而殮之安上達貴州安順人閭門死難事
聞贈還醇光祿卿予祭葬有司建祠具官其一子上
達等亦贈卹給驛歸其喪已而吏科上言還醇城亡
與亡之死靡貲猶曰有守土責也安上達史之棟等微員
末職亦能致命遂志有死無隕宜破格褒崇以為世勸
朝廷必不惜今日之虛名作將來之忠義乃僅贈國學
教職良鄉主簿于聖主優卹之典謂何帝感其言下
部更議乃贈上達廷表五經博士與史之棟楊其禮
及千戶蕭如龍何秉忠百戶李雁皆配祀還醇祠同
時殉節武舉陳彞測諸生梅友松等十五人烈婦朱
氏等十七人並建坊旌表順天府尹劉宗周言上達
得死難之正請贈翰林苑官坊不報中甫雲南人金聲
正希休寧人明唐王時殉節周鎮遵義人本朝乾隆
四十一年追謚相壽忠烈還醇南鎮烈愍聲忠節
上達廷表之棟其禮等與同時殉節之千戶蕭如龍

何秉忠百戶李陰武舉陳彞測生員梅友松
並入祠梁廷棟鄆陵人劉宗周字起東浙江
山陰人

罷大學士錢龍錫

錢龍錫阻抑邪
黨其立身尚有
可稱至袁崇煥
擅殺島帥豈關
龍錫主謀且當
時尚未罪擅殺
之人顧事後輒
因過寓一言坐
局外者以發蹤
指示豈為平允
奸人借端抨擊
伎倆往往如斯

御史高捷史塗本閩黨王永光引用之頗為龍錫所
托二人因是大恨方袁崇煥之殺毛文龍也報疏有
輔臣龍錫為此一事低徊過臣寓語而崇煥欲成和
議又嘗以書商于龍錫及是崇煥已下獄捷塗遂上
言議和殺將皆龍錫發縱指示宜與崇煥並罪帝以
龍錫忠慎戒無過求龍錫抗章申辨捷塗再疏力攻
詞益危切帝意頗動龍錫再辨引
疾乃放歸時兵事方棘未暇竟也

山西援兵潰于良鄉

莊烈始猶戒勿苛求迨再疏力攻遂不免意移色動放還未久速擊旋加幾至沉寃西市前此熊廷弼之獄楊左皆坐以慘毒殞身莊烈豈無聞見何羣小效尤羅織竟不加深察耶

先是宣大總督及宣府保定山東河南山西巡撫聞京師戒嚴皆奏請帥師入衛並奏請應天鳳陽陝西浙江各巡撫及撫治鄖陽都御史統步卒勤王至是山西巡撫耿如杞偕總兵官張鴻功以勅卒五千人赴援軍令卒至之明日汎地既定而後給餉如杞兵既至兵部令予通州明日調昌平又明日調良鄉汎地累更軍三日不得餉乃譟而大掠帝聞之震怒逮如杞鴻功下獄時四方援兵先後集以缺餉故多肆剽掠獨河南巡撫范景文馭軍有紀律所將八千人餉皆自齎秋毫無所犯移駐東門再駐昌平遠近恃以少安明年春陝西諸路總官官吳自勉率師勤王所部延安兵亦潰巡撫張夢鯨恚死而甘肅巡撫梅之煥奉詔入衛將行西路乘虛入犯之煥止留遣兵伏賀蘭山後邀其歸路再戰再敗之乃引軍東俄悍卒王進才殺叅將孫懷忠等以叛走蘭州之煥西定其變復整軍東比抵京師已後時矣遂落職罷去

如杞既下獄論死後二年斬西市如杞初為職方郎中與主事鹿善繼黨張鶴鳴排熊廷弼而庇王化貞封疆由是大質實范景文字夢章吳橋人張夢鯨璵議者罪之絳縣人梅之煥字彬文麻城人

發明

明代軍律不嚴將驕卒惰承平之日索餉肆者已不可更僕數而況赴援遠涉顧可三日

無糧耶且夫將士千里勤王分守要地尤當預為部署使屯駐有一定之所乃今日通州明日良鄉檄調分更漫無定策誰秉中樞誤國若此卒之鎮巡就逮駢首服刑而本兵置之不問即亂卒之潰而西者亦未嘗設法捕禦竟聽其出飛狐越井陘悍然無忌以合于賊宜延綏甘肅之相繼而潰也

以周延儒何如寵錢象坤並為禮部尚書兼東閣大學士預機務

延儒性機警善伺意旨以會推不預與溫體仁比數
為言者所劾帝不聽特命入閣時都人祭默者請以
私財聚衆助官軍如罷力言其巨測會帝得偵事者
報與如罷言合由是受知衆坤奉命守城初寒不懈
帝覘知之遂錢象坤字宏
並命入閣質實裁會稽人

庚午三年春正月韓爌罷

中書舍人原抱奇以爌為袁崇煥座主遂劾爌主和
誤國宜與錢龍錫並罷帝重去爌貶抱奇秩無何庶
子丁進以遷擢愆期怨爌亦劾之而工部主事李逢
甲申劾疏復繼上爌三疏引疾歸爌先後作相老成
慎重引正人抑邪黨天下稱其賢初熊廷弼既死傳
首九邊屍不得歸葬後其子詣闕疏請爌言于帝曰
廷弼之死由逆闖欲殺楊漣左光斗誣以行賄因盡
殺漣等復懸生廷弼賊銀刑及妻子比寃之甚者帝

乃許叔堃燭遇事持平多類此質實

原抱奇由輸貢進里貫未詳丁進上虞人李逢申上海人皆

燭主會試所舉士燭罷後十四年李自成臨蒲州迫燭出見不從賊執其孫以脅燭燭止一孫乃出見孫得釋燭歸憤鬱以卒年已八十有餘矣

兵部侍郎劉之綸帥師戰于遵化敗績死之

初金聲之薦申甫也并薦之綸知兵可大任帝即召之奏對稱旨遂自庶吉士超擢兵部侍郎副尚書閔夢得協理京營戎政之綸未受任時與申甫二人皆好談兵私貸制軍輪火車偏廂車獸車剡木為西洋大小砲銃欲以軍績自效既貳樞部意氣感激以甫與滿桂等相繼敗歿教然請行乞京營兵為己部不許乞闕外川兵又不許乃召募萬人勒為八營以副總兵八人分將之廷臣見之綸驟貴受命視師皆不

悅中允文震孟使人諷之綸謂當辭侍郎而易科銜以行不聽冒雨雪誓師行至通州守者拒不納天大雨雪宿古廟中言官劾其逗留之綸憤上疏曰小人意忌有事則委却無事則議論止從一侍郎起見耳乞劑臣今官賜骸骨不許遂越通州而東

大清兵亦已由通州東渡克香河以月之四日甲申拔永平戊子拔遷安下灤州越十三日庚子駐三屯營分兵守漢兒莊方放行而之綸遂出薊州遣別吳應龍等從間道規取羅文峪關自率八營抵遵化列屯城外我守城兵突出擊之破其二營之綸之軍猶不退我

大軍聞報乃自三屯營整兵而西麾精騎三萬夾陣砲矢並發之綸軍大潰獲其裨將一人訊之曰營娘娘廟山者之綸也

太宗文

皇帝諭我軍曰可生縛之綸來于是大貝勒代善以兵圍山招之降不從縱兵擊之之綸發炮炮

炸軍營自亂左右請給陣徐退之綸叱之曰
毋多言吾受國重恩吾死耳嚴鼓再戰流矢
四集之綸解所佩印付家人令持歸報朝廷走
遁入石巖中我總兵官楊額禮子穆成格射
殺之八營兵前後覆其七一軍夜遁去蓋
是月二十二日壬寅也敗書聞帝嘉之綸忠
從優卹贈兵部尚書震孟止之曰之綸死分
也侍郎非不尊遂不予贈賜一祭半塋任一
子先是之綸次薊州與總兵官馬世龍吳自
勉令由薊趨永平拒我

大軍世龍自勉不赴約獨之綸前進已敗吳應
龍亦敗于羅文峪副總兵金日觀駐馬蘭聞
應龍敗遣將馳援皆敗歿

大清兵乘勝進攻馬蘭城甚急日觀堅守親燃
大砲焚頭目手足意氣不衰乞援于世龍世
龍令參將王世選等赴救兵乃退已復以二

千騎來攻日觀偕世選等死守不下時京城東列城
多失守守城將吏死事者香河則知縣任光裕永平
則司使鄭國昌知府張鳳奇推官盧成功盧龍殷諭
趙允殖副總兵焦延慶參將呂鳴雲指揮張國翰守
脩程應琦城守中軍房應祥千總石可玩梁壯威胡
承祚卜小峯張學閔仇耀先牛星耀把總楊開泰百
戶楊廷棟里居中書舍人廖汝欽武舉唐之俊諸生
韓洞原周祚新馮惟京弟聯京胡起鳴胡登龍子先
奎羅世傑弟拔琛折李光春丁應掄李大燦劉可廷
田種玉子福元侄士傷張汝恭王元輔武生張鴻鵠
義民李應陽張俊郭重先張宗仁張禮李大眾張尚
義傅守望等灤州則知州楊濂漢兒莊則副總兵葉
應武而山海北路副總兵官惟賢亦以襲遵化敗死
方

大清兵下灤州之明日分兵自撫寧向山海關離關
十里列三營惟賢與參將陳惟翰等設兩營以拒

大清兵乃還攻撫寧昌黎既而惟賢奉世龍檄率惟翰及遊擊張奇化等往襲遵化至城西波羅灣城中兵出擊先鋒殊死戰

大清兵收入城後隊乘勢進攻城上矢石如雨尋復遣

兵出戰惟賢臨陣中箭死士卒實實昌黎遼廣寧縣殺傷者三百餘人奇化亦敗歿

金改曰昌黎明

屬永平府今因之羅文峪関在遵化州非十八里山寨堡東馬蘭峪東第十四関口也娘娘廟山在遵化

州西八里波羅灣亦在州城西劉之綸字元誠宜賓人既敗死尸還矢飲于顱不可拔金聲以齒啣之出

以援其家人之綸母老二子幼貧不能返柩請于朝給駟還久之贈尚書金日觀浦江人任光祿霍州人

鄭國昌邠州人以按察副使治兵永平遷山西右布政使上官奏留之城破與守脩程應琦自縊死應琦妻奔告國昌妻與偕死應琦山陰人張鳳奇陽曲人國昌鳳奇閭門並殉節也盧成功高要人趙允殖遼

陽人焦延慶盧龍人官三屯營副總兵罷歸分守南
門陣亡呂鳴雲山海衛人張國翰東勝衛人楊煥銅
仁人胡光奎父登龍馮維京弟聯京田植王子福元
姪士鶴俱死事聞贈國昌太常卿鳳奇光祿卿光裕
光祿丞煥光祿少卿並賜祭葬廕一子成功等贈卿
有差葉應武龍游人按甘肅通志有寧夏人鄭感民
者時官督師軍前監紀永平推官亦闔門殉節本
朝乾隆四十一年追諡劉之綸忠烈鄭國昌張鳳奇
楊煥官維賢張奇化烈慈任光裕盧成功焦延慶呂
鳴雲張國翰程應琦廖汝欽葉應武鄭感民節愍趙
允殖等
並入祠

發明

明末國是日非其亡懸于呼吸雖百之綸亦
無益然慷慨誓師誠心為國而眾忘其驟貴

而恍之乞兵不與致令自募馴至于敗及臨陣捐
軀莊烈欲陵卹以勵其餘宜也文震孟又從而沮

之惟任私意而罔顧公義天良漸滅盡矣震孟立
朝風節在當日頗有可觀而亦復出此殆不免為
習氣之
所移耶

二月立子慈娘為皇太子

慈娘以二年二月質實慈娘莊烈帝第一子周皇后生

三月李標罷

初與標相者六人來宗道楊景辰以附璫斥劉鴻訓
以增較成周道登錢龍錫被攻去獨標在間稍久頗
能隨事匡益然時方爭門戶帝亦
深疑廷臣有黨遂連疏乞休去

夏五月我

大清兵東歸

先是

大清兵次燕京我

太宗大皇帝欲息兵安民六致書議和皆未報
太宗曰彼以城下之盟為恥耳遂引兵東既下永平遼安樂

州京師道梗總理馬世龍統四方援兵壁于薊門督
師孫承宗鎮山海關東西相隔絕承宗募死士沿海
達京師始知圍城尚無恙關西南三縣曰撫寧昌黎
樂亭西北三城曰石門臺頭燕河六城東護關門西
繞永平皆近關要地承宗飭諸城嚴備禦而遣將戎
關平守建昌聲援始接我

上天

大清復遣書議和極言師旅頻興生民罹禍
好生之德我兩國當共體之至是遂旋師取道冷口而

歸承宗先後復灤州
還安永平遵化四城
質實石門路在撫寧縣東北九
十里山海關西北四十里

亦曰石門砦臺頭營在撫寧縣北三十里燕河路在
盧龍縣東北五十里建昌路在遼安縣東北四十里
冷口關在遼安
縣東北七十里

六月流賊陷府谷

是年春流賊王左掛等攻宜川為知縣成材所却轉
攻韓城總督楊鶴命叅政洪承疇禦之俘斬三百餘
人圍解賊走清澗鶴以陝西五鎮勁兵皆入援關中
無帥連疏請遣諸將還鎮不果起前總兵官杜文煥
督延綏固原兵而以承疇代張夢鯨為巡撫便宜討
賊會延安知府張輦都司父楊威賊延川降其魁王
子順張述聖姬三兒于是王左掛及其黨苗順等亦
乞降獨王嘉允不受撫肆掠延安慶陽鶴匿不以聞
是時泰北加派之賦曰新餉曰均輸曰間架其目日
增吏因緣為奸民大困多往從賊而山西甘肅延綏

明代怯于用兵
母視招撫為長
氣正德間馬中
錫桑園之前

鑒不遠至流賊
四起伏莽漸多
楊鶴受命剿除
不能迅加剪滅
顧一味主撫事
皆諱匿不言己
重負委任迨賊
衆詭稱降順既
不審虛實之情
又漫無制馭之
法但于城樓設
座立誓山呼事
同兒戲使羣寇
蔑視官兵以致
癰潰日深寢成
大患其後陳奇

勤王兵之潰而西者復走與賊合賊愈不可究詰有
別賊橫天一字王者自神木渡河臨山西之蒲縣分
道東犯趙城洪洞汾霍西掠石樓永和吉陽全晉震
動鶴辦賊關中恒怯莫知為計力持撫議遣官持牌
四出招賊賊渠王虎小紅狼一大青掠地虎混江龍
等皆給以免死牒安置延綏河曲間賊淫掠如故有
司不敢問而嘉允已襲破黃甫川清水木爪三堡遂
于是月癸丑攻臨府谷木脂賊張獻忠起應之勢甚
熾張獻忠者延安衛柳樹澗人也初隸延綏鎮為軍
犯法當斬主將陳洪範奇其狀貌為請于總兵官王
威輝之乃逃去後叛兵神一元領紅旗為先鋒及是
據有米脂諸寨自號八大王與嘉允互為聲援總兵
官尤世祿怯不能禦承疇文煥聞之馳救府谷擊敗
嘉允嘉允佯乞降仍奪路走黃甫川勾西人入犯承
疇文煥大破之賊奔潰軍還擊張獻忠于清澗又破
之蓋是年十月丙寅也降賊王左掛謀以綏德叛承

瑜熊文燦等復踵其謀賊勢燎延海內遂無寧宇雖務苟安而昧決勝當時積習相沿迷而不悟而鶴實縱寇之尤也

疇與巡按李應期計誅左掛等亂乃定承疇有幹畧足辦賊顧流賊所在蜂起神一元不沾泥可天飛郝臨菴紅軍友點燈子混天猴獨行狼等或西掠秦或東入晉屠陷城堡官軍東西奔擊旋滅旋熾迄莫能盡也張獻忠敗于清澗之月嘉允復擁眾陷清水營殺遊擊李顯忠府谷再陷其黨李老柴又嘯眾三千人攻合水鶴徽寧夏總兵官賀虎臣往勦俘馘六百有奇捷方報制府而山西總兵官王國梁追嘉允於河曲敗績賊入據其城建議設大將兼統山陝軍協討仍詔文煥為提督偕延綏副總兵曹文詔馳至河曲絕饗道以困之未幾神一元攻陷寧塞柳樹澗等城文煥家寧塞遂令西還援勦而留文詔討河曲賊

質實 延川隋改文安縣置明屬延安府今因之蒲縣漢蒲子縣也後周改置蒲縣金升州元仍降縣

明屬平陽府今屬隰州洪洞趙城汾西皆隋置明並屬平陽府今悉因之永和後周臨河隋改永和明屬

隰州以隸于平陽府 本朝雍正二年升隰州為直隸州永和仍屬馬黃甫川堡在府谷縣東北七十里清水堡在府谷縣東北六十里木瓜堡在府谷縣北五十里柳樹澗在定邊縣東一百四十里寧塞堡在靖邊縣西四十里洪承疇泉州南安人尤世祿府谷人曹文詔大同人李顯宗籍貫無攷 本朝乾隆四十一年追諡烈愍

以禮部尚書溫體仁吳宗達並兼東閣大學士預機務

體仁為人外曲謹而中猛勢機深刺骨言官屢劾其奸邪帝謂體仁孤立益嚮之周延儒復力為之援遂與吳宗達並入閣體仁既得輔政勢益張宗達徒充位而已踰年吏部尚書王永光罷體仁以其鄉人閔洪學代凡異己者率以部議論罷而體仁陰主持之又用御史史文舉高捷等為腹心日以傾正人庇宵小

為事所欲推薦陰使人發端已承其後欲排陷故為
寬解中上所忌激使自怒帝往往為之移初未嘗有
迹于是職方員外郎華允誠憤體仁等亂政疏陳三
大可惜四大可憂畧言當事偕陛下剛嚴而佐以舞
大擊斷之術倚陛下綜核而騁其訟通推箕之能遂
使和恒之世競尚刑名清明之躬寔成叢脞以聖主
圖治之盛心為諸臣鬪智之捷徑可惜一率屬大僚
驚魂于回奏認罪封駁眾臣奔命于接本守科遂使
直指風裁徒徵事件長吏考課惟問錢糧以多士靖
共之精神為案牘鈎校之能事可惜二廟堂不以人
心為憂政府不以人才為重四方漸成土崩瓦解之
形諸臣但有角戶分門之念意見互舛議論滋擾遂
使勦撫等于築舍用舍有若舉碁以興邦啟聖之歲
時為即輦從昧之舉動可惜三人主所以總一天下
者法令也王化貞楊錫之喪師誤國厥罪惟均陛下
中明三尺肆錫市朝以懲封疆大吏化貞恃有奧援

獨措顯戮遂使刑罰不中鐵鉞無威一可憂也國家
所恃以為元氣者公論也直言敢諫之士一鳴輒斥
指佞薦賢之章目為奸黨不惟不用其言并錮其人
又加之罪遂使暗默求容是非共蔽二可憂也國家
所賴以防維者廉恥也近者中使一遣妄自尊大羣
僚趨走惟恐後時陛下以近臣可倚而不知律竇已
開以操縱惟吾而不知屈辱士大夫已甚遂使阿諛
成風羞惡盡喪三可憂也國家所藉以進賢退不肖
者銓衡也我朝罷丞相以用人之權歸之吏部閭臣
不得侵焉今次輔體仁與冢臣洪學同邑朋比惟異
已之驅除閭臣兼操吏部之權吏部惟阿閭臣之意
造言請命夜以為常黜陟大抵祇供報復之私甚至
庇同鄉則逆黨公然保舉而白簡反為罪案排正類
則講官借題逼逐而薦剋遂作爰書欺莫大于此矣
擅莫專于此矣黨莫固于此矣遂使威福下移舉措
倒置四可憂也疏入帝詰其別有指使允誠乃列上

洪學徇私數事且曰體仁生乎紛臂塗願庶隅掃地
陛下排衆議而用之以其悻直寡諧豈知包藏禍心
陰肆其毒又有如洪學者為之羽翼遍植私人成盡
善類無一人敢犯其鋒者臣復受何人指使帝以體
仁純忠亮節摘疏中語再令陳狀允誠復上言二人
朋比舉朝共知溫育仁不識一丁而得首拔羅喻義
進講章以左右非人一語而部議削職此非事之彰
明較著者乎帝亦悟兩人同里有私乃奪允誠俸半
年而洪學質實吳宗達武進人中行從子華允誠字
亦旋罷去汝立無錫人溫育仁烏程人體仁弟
也楊鎬以崇禎二年棄市六年王化貞始伏誅

秋八月殺前督師尚書袁崇煥逮前文淵閣大學士錢

龍錫下獄尋遣戍

史莖疏言龍錫主張崇煥斬帥致兵倡為和議以信
五年成功之說賣國欺君莫此為甚其出都時以崇
煥所畀重賄數萬轉寄姍家巧為營幹致國法不伸
帝怒杖刑官五日內具獄獻上帝召諸臣于平臺論
崇煥謀叛當寘極典責龍錫私結邊臣蒙隱不舉令
廷臣議罪是日羣議于府中謂斬帥雖龍錫啟端而
兩書有處置慎重語意不在擅殺至議和倡自崇煥
龍錫亦未之許然軍國大事私有兩度不抗疏發奸
何所逃罪遂遣使逮龍錫而磔崇煥于市兄弟妻子
流三千里籍其家無餘貲天下冤之十二月龍錫逮
至下獄復疏辯悉封土崇煥原書及所答書帝不省
時羣小麗名逆案者方日為翻案計莖等以龍錫為
東林所推欲借崇煥以及龍錫因龍錫以及諸異已
者指崇煥為逆首龍錫等為逆黨更立一逆案與前
案相抵諒既定溫體仁王永光主之欲發自兵部尚
書梁國棟憚帝英明不敢任而止乃議龍錫大辟決

不待時且用夏言故事設廠西市以待帝以龍錫無
逆謀令長繫明年中允黃道周復上疏申救忤旨貶
秩調外而帝意寢解尋詔所司再獻減死戍定海衛
○龍錫在戍十二年兩赦不原其子請輸粟贖罪會
周延儒再當國尼不行福王
質實定海五代時吳越
時復龍錫官歸里未幾卒
析鄞縣地置望海
縣宋改定海明屬寧波府于縣置衛屬浙江都司以
隸于左軍都督府本朝康熙二十六年別置定海
縣于舟山改改定海縣為鎮海縣仍屬寧波府衛廢
黃道周字幼平漳浦人唐王時殉節本朝乾隆四
十一年追
諡忠烈

冬十二月增田賦

戶部尚書畢自嚴既以度支大絀奏行增鹽引諸事
已又列十二事曰增閩稅捐公費鬻生祠酌市稅汰

民窮起于官貪
廷棟所言不為
無見然未聞懲
官貪而先加派
民之顯賴轉深
所為懽然者安
在蓋明季耗敵
之由而神宗礦
稅征求日殷月
削時閱數朝物
力更無留餘之
地及莊烈時大
兵大疫元氣已
竭盡無遺又軍

冗役核虛冒加抵贖班軍折銀吏胥納班河濱
灘蕩覈東京水田之賦開殿工官帶之例帝悉
行而兵食猶不足至是兵部尚書梁廷棟復言今日
間左雖窮然不窮于遠餉一歲之中陰為加派者不
知其數如朝覲考滿行取推陞少者費五六千金合
海內計之國家選一番守令天下加派數百萬巡撫
查盤緝訪餽遺謝薦多者至二三萬金合海內計之
國家遣一番巡方天下加派百餘萬而曰民窮于遠
餉何也臣考九邊額設兵餉兵不過五十餘萬餉不
過千五百三十餘萬何憂不足故今日民窮之故唯
在官貪使貪風一息即再加派民亦懽然帝俞其言
下戶部協議自嚴阿廷棟意即書今日之策無踰加
賦請畝加九釐之外再增三釐于是增百六十五
萬有奇合舊所增凡六百八十餘萬天下益耗矣

興日增轉餉日
絀雖藉口醫瘡
并無可剗之肉
即亟允呈潤之
疏未必有濟况
并此不能用乎

御定資治通鑑綱目三編卷三十四